

平
播
全
書

平播全書卷四

明長垣李化龍著

奏議

攻剋婁山崖門等關四報捷音疏

題爲大兵連破重關漸逼賊固再報捷音事案照先爲三省征播大勝蜀黔更破險關再報捷音事該臣將蜀師攻剋桑木關黔師攻剋烏江河渡二關各功次具本於本年三月二十一日題知間又爲黔路失律喪師得關復失據實查叅以肅軍政事該臣復將黔路失事緣由具本於四月初三日叅題訖所有三月二十二日起至四月初二日

止三省官兵連日與賊交戰情形功次應合據實爲皇上
陳之據龍泉路湖貴監軍參議魏養蒙督餉紀功副使陳
與相路雲龍報據監紀思州府推官吳天佑成都府雙流
縣知縣鄧宏烈報准統兵副總兵陳良玘報據領兵參將
王一桂指揮唐一麒報稱奉令於三月十三四等日督率
施南散毛忠峒忠建高羅大旺臘壁盤順東流喇惹等司
寨宣撫安撫等官覃宜等土兵五千攻打板角關與賊大
戰於十五日奮勇剋破共斬賊級二百零九顆生擒一名
俘獲男婦一十六名口馬一匹器械不計陣傷土兵四十
九名各司官兵據關劄守至十八日申酉戌三時又報楊

酋統馬步四萬名爲老虎兵二路包圍關隘次日寅時參將王一桂指揮唐一麒督同施南等官分兵迎敵從寅至未血戰百合我兵雖少戰氣百倍又斬賊級一百七十九顆奪獲器械甚多陣傷土兵三十九名又據副總兵陳良玘報稱節發督兵指揮劉之屏劉自西與爲事守備楊惟中千戶張夢麟陳國祚譚世元陳大順丁慶戴天珠王億千總周世祿哨官江添濟等各率兵攻打黃沙盤腳葛漏等囤并協攻板角等處共斬獲首級六十一顆生擒有名酋惡林正傑等八名又據參將王一桂報據標下千戶孫應朝錢子惠把總黃明儒周世祿等各招撫過播地夷民

劉朝東朱正湖劉仲和董國相彭寵楊文秀羅俊甫等一百三十七戶男婦四百零五名口又據副總兵陳良珌報據守備楊惟中指揮中軍把總塘報劉之屏葉定遠周世祿王優趙志定等各招降過播民蕭繼祖廖朝剛張朝世蔣榮等八百九十七名口又取出被虜屯軍董國武何尙八黎世華等七百零三名又據南川路監軍參政張棟督餉紀功僉事徐仲佳報據監紀重慶府推官高折枝報准征播總兵官馬孔英報稱三月初八日剋破桑木關之後至十二日分撥提調駱有餘把總褚眞兒漆太然劉添忠各領兵進關遇賊拒敵又眞州司長官駱麟鄭葵舍人鄭

紹仁平茶司土官楊光祖千總楊光宗舍把楊正英楊正
瓊楊正元鄧添爵楊正模等各領兵攻打銅鼓二羊草果
五龍鬼崖風竹羊崖早木濃水等國寨與賊敵戰披靡共
斬賊級七十一顆生擒一名俘獲賊屬男婦二十五名口
馬四匹器械九件輕傷軍兵二名十七日又據參政張棟
報據推官高折枝呈准總兵馬孔英報據領兵參將周國
柱李經報稱各職同守備萬民英宣撫冉御龍馬千乘邑
梅司千總楊正侯楊正伯楊正韶楊通榮眞州長官鄭葵
延綏營千總李進固原營中軍李桂芳毛兵把總余武募
兵把總漆太然劉勝李舉高尙江等統領各部下漢土官

兵前去攻打金子壩已時到彼並無賊出惟空寨一十九處并楊應龍衙門一所隨令各兵用火燒焚一以靖其積聚一以誘驚賊兵各兵意在貪取職等恐中賊計卽嚴令安營不得四散止分奇兵焚打至未時撤回留輕健精兵潛伏便道以防賊追至酉時果有苗賊數千從溝箐奔出我兵吶喊撲殺賊見兵起復同奔走追至金子等國共斬賊級二百五十八顆內一顆驗係頭目莫阿琴生擒八名俘獲男婦二十五名口馬一匹器械十件陣傷延綏家丁一名天色近暮撤兵回營又據參政張棟報准總兵馬孔英報稱三月二十六日本鎮真各將領周國柱李經任承

爵等會同推官高折枝統兵下桑木關暫住金子壩創營一面就草餵馬一面哨探虛實前進不意播賊楊珠同逆子楊朝棟統兵三千有餘伏林衝桑木關營本陣起營在賊先賊遂衝入空營驚散糧夫得平茶司長官楊光祖率後營石砧兵齊到夾攻賊始退屯金子壩口意在絕我馬軍與關上軍後哨兵報到本鎮卽會高推官責令將領等官周國柱等發兵迎敵驟然撲砍一處鏖戰半日不退各營官兵奮勇益戰賊兵始大敗當陣斬獲賊級一百零四顆內一顆係頭目曹把事首級生擒五名內一名係楊朝棟跟隨馬夫楊喜兒奪獲器械一百二十五件馬三匹陣

亡家兵十一名輕重傷兵一百一十二名射死操馬二十
二匹賊見我兵擁至棄甲敗走天色已晚收兵回營隨會
推官高折枝并諸將計議欲往金子壩劄營相近白田壩
慮恐糧夫隔關難至仍統兵桑木關暫住俟候運餉稍集
進取又據綦江路川東監軍參政張棟督餉紀功參政張
文耀報據監紀敘州府同知史朝貞報准原任南京都督
府署都督僉書今充爲事官劉綬手本內稱本鎮詢問鄉
導咸謂狡酋於此路地名滴淚三坡瓦窯坪一帶聯絡屯
營壘石劄隘設苗據險石虎關以重兵防守我兵自下而
上急切難攻於是本鎮親督官兵以二十五日自夜郎舊

城分發五路並進連奪滴淚三坡瓦窯坪石火爐各險寨
及剋破石虎關追至炒米坡天晚收兵時據領兵遊擊周
敦吉守備徐珊周以德陳大綱千總劉可春等呈報連日
剋關破隘與賊大戰共計斬級四十七顆生擒五名俘獲
男婦三名口投降三十六名口奪獲器械五件陣亡兵一
名輕重傷兵四名射死戰馬二匹本日卽督勵三軍攻剋
悶頭大箐此箐路徑先是狡酋已用木石逐節壘砌塞斷
仍於兩林埋伏惡苗各以弓弩射打我兵一面齊用銃礮
抵敵一面拆壘打過大箐攻取炒米坡直抵頂山三壩等
寨係總理舍人楊兆麟頭目張漢清郭俊聶璽何廷順等

擁眾把截周圍設險本職分兵四面攻打賊眾拒敵矢石如雨我兵銃弩夾攻火器齊發焚燒各處營寨煙燄蔽空震驚數十里外於是兵威大振賊遂披靡抱頭鼠竄奔入婁山井各深箐官兵奮勇追勦斬獲壯苗三十一顆俘獲賊屬一十五名口奪同被虜五名當陣投降男婦二十五名口奪獲戰馬三匹牛五隻包甲器械三十五件二十八日前兵乘勢直抵南溪口鬼崖一帶聯絡劄營仍分爲四路並出奇兵重賞鄉導指引捷徑開闢林箐令各官兵攜帶乾糧掩旗息鼓一分左路官兵自播川由九壩石炭關龍堂寺抄出板橋白石口以防應龍援寇井會有路以攻

婁山關一分右路官兵自官渡河城頭箐砍開道路抄出白石口以攻婁山關之後本鎮親督官兵由中路官渡河南溪口以攻婁山關之前并發中左路官兵自赤土鋪出小婁山抄出白石口設伏應援各路約定日期一齊攻打二十九日黎明攻進婁關箐口萬山叢聚連峰插天蛟酋恃險築隘復用亂石壘砌并以台抱大樹塞斷兩傍掬挖深壕陷坑內安竹簽設立木關一十三座每關前立數層鹿角排柵上立敵樓三處堆積礮石梭杆賊旣據險仰攻爲難我兵方至箐口賊卽出關迎敵關上矢石如雨人莫敢近本鎮向前調度隨用火礮烏銃一齊攻打并令調到

遊擊都司奈世威王芬哈光顯羅星都指揮杜熊兆分投策應各賊抵敵不住當陣銃中楊酋舍人楊兆麟肩喉一彈傷重未死千總劉可春下達子射死提調聶璽坐寨馬江元因隔排柵俱被賊眾搶救馱同官兵奮勇一齊搶入斬關敵打連破關門一十三道斬級二十六顆俘獲男婦三十一名口各苗跳崖帶傷投箐死者無數勢難找級奪回被虜男婦三名口牛馬百十餘隻包紮軍器數百餘件陣亡內丁日本一名重傷官兵三十二員名輕傷七十二員名箭傷倒死馬一十九匹三十日官兵乘勢前去攻打永安莊楊酋添老虎兵接戰我兵用銃礮敵打又乘勝追

至石笋國眾苗見兵勢大不敢入國奔箐潛逃官兵將國
焚燒左路領兵周以德右路領兵周敦吉等直抵永安莊
會哨共斬賊級二十七顆俘獲男婦二口奪回被虜男婦
三名口爲照此路官兵半月以來破關奪隘東蕩西除擒
斬招降威聲大振賊膽已寒卽今官兵一據婁山關爲老
營一據白石口爲腰營一據永安莊爲前營前後犄角左
右設防此去播州白田壩海龍國僅五六十里稍俟諸路
並集約會夾攻賊不足平矣又據合江永甯二路川南監
軍參政謝詔副使史旌賢參議劉一相各報據監紀馬湖
府知府蔡宗憲嘉定州同知趙世德各報准鎮守四川總

兵官吳廣手本報據領兵原任副總兵曹希彬參將吳文傑報據永甯宣撫司土官奢世續呈稱前差目把張嵩總管劉國用等宣諭安村長官安守邦安鑾父子投順之後忿恨楊酋坐寨提調何文明等阻伊向化立斬何文明等首級九顆生擒王金受獻出到營以表真誠併帶次子安祥及把事安甫等二十餘人投見到鎮量行犒賞隨審各民約有壯丁三千并男婦老幼共計一萬二千餘名口俱願跟隨土官奢世續隨給本官統領安插訖又據總兵吳廣報據督陣官徐登報稱地名樓底陳家峒有賊一夥將進播州登卽督長官袁初等兵圍守黑峒袁鼎同頭目袁

國佐抹賽龔珠親兵哨官楊富等領兵分投打破陳家峒
當陣斬獲壯苗首級二十三顆生擒寨主王好國俘獲男
婦一十餘名口餘賊被傷逃入深箐我兵被弩射傷五名
又據參議劉一相報據儒溪長官袁起龍袁見龍報稱奉
委護運糧餉有親管龔珠在於麻子壩黑峒口遇賊交戰
共斬賊級一十三顆生擒男婦一十六名口招降吼灘夷
目趙宗端等男婦三百餘名口又據參政謝詔報准總兵
吳廣報據都司吳從周等報稱奉令督率漢土官兵前去
馬鞍山劄營各賊埋伏四起我兵奮勇追賊四散入箐當
陣斬級四十二顆生擒六名烏銃傷死賊馬二匹器械百

餘件因天暮不敢窮追審據生擒何應兒等吐稱頭目郭通緒久將馬鞍山一帶夷民妻子拘在小水田晏山園約六七千餘人殺牛祭旗賞軍要與官兵對敵勝負何如然後入關又據參政謝詔報據知府蔡宗憲報准總兵吳廣手本報據領兵遊擊司懋官都司封建趙應科吳從周千總鄭子龍曾太張子明等各報稱於二十九日奉令征剿眼山園兵到磨槍垵就遇督軍總管郭通緒率眾二千餘徒蜂擁接戰有前左二營官兵當陣斬獲郭通緒首級一顆揆出身上楊應龍說帖一張各項書信數張就據降人黃月興等識認是的又據各兵斬獲首級四百餘顆奪獲

器械不計二十七日發兵攻崖門關以圖進取隨據哨探塘報稟稱前路閔山國有賊把截本日卽移本山連珠屯營復報賊屬男婦在大山老林中藏匿洞內賊兵盤據國上抗阻官兵不容入關等情及照此國係黨賊何濛領兵據守素稱桀驁副將曹希彬參將吳文傑督同守備江萬化周大謨等與宣撫司總管劉國用等長官劉謙等各領精兵齊至賊國示降免誅各賊負固抗敵標矢如雨自卯至午銃礮大震火器盈山賊兵抵當不住我兵直前上國奮勇攻殺當陣斬級一十八顆生擒六十五名俘獲峒箐男婦四十名口奪獲槍刀絮被標弩器械六十四件牛二

十三隻我兵輕傷十餘名傳令撤兵同營休息牛隻均賞
各營官兵二十九日移營母豬塘三十日直至幹壩逼近
崖門關四面攻擊斬入第四關內圍上男婦膽寒哭聲震
天頭目趙圭遂斬提調羅世恩首級并男婦萬餘獻出投
降又頭目羅剛部下賊首劉宗成張桂枝孫桂山袁傑等
亦望風扶老攜幼率眾百餘羅拜馬前投見又該知府蔡
宗憲看得趙圭因見郭通緒等授首卽斬羅世恩獻出并
劉宗成等投降則外關悉平兵威大振矣初二日又據本
官報准總兵吳廣報稱本鎮於三月二十一日自二郎壩
發兵三路盡掃關外村圍梗化約以三十日諸哨俱抵崖

門關四月初一日辰時本鎮馳至關前催督未時據副將
曹希彬等報稱遵令是日黎明齊至關下各賊擁眾萬餘
出關拒敵職等督率中軍千總目把鄭子龍等傳示懸賞
各兵踴躍爭先彼以矢石如雨我以銃礮震天各營官兵
攀崖並進奮勇血戰連斬數級賊遂奔潰各漢土官兵乘
勝直衝入關合先飛報看得官兵奮勇斬關致賊奔潰漸
攻漸入元惡當卽授首矣又據參政謝詔報准總兵吳廣
移稱永甯宣撫司目把胡文宗張嵩劉國用傅廷鑾招降
過播民張萬才等家男婦八十五名口猶承教等三百餘
家男婦七百餘名口曹都子三老等男婦三十餘名口馮

時濟等男婦二十七名口劉復善等男婦一千餘名口各懼官兵殺害俱來投降隨帶酒肉飯食犒送我兵疑其有毒未食復善等因自食之遂准投劉國用等收降各安插永甯地方暫住訖又據偏橋路湖廣監軍按察使胡桂芳參議魏養蒙督餉紀功副使王應霖呈准鎮守偏橋總兵官陳璘手本內稱二月二十七日督兵攻打龍溪山捷報之後次早發兵追至袁家渡各賊對敵不過我兵擒斬賊級一百二十二名顆俘獲賊屬男婦八十四名口牯牛一百零一頭賊仗六十四件官兵陣亡四名被傷二十七名又稱三月初一日自袁家渡收兵回劉龍溪老營初六日

督兵於乾溪坪與賊接戰數合互有損傷各兵奮勇衝鋒兼用火器賊敗當陣斬獲賊級五十九顆奪獲賊仗十件沙水牛三十二頭俘獲賊屬二十二名口陣亡兵一名被傷兵七名餘賊逃竄恐有埋伏不敢窮追十五日下令各兵取辦竹木密遣死士連夜搭造浮橋十九日率眾渡江卽差哨役前去偵探拏獲一賊到鎮供稱楊應龍先發銀來每人犒賞二兩督令張佑何漢良謝朝俸石勝俸等率老虎軍萬餘見劄七牌野豬山伺我兵渡江出奇邀敵等情本鎮親督官兵銜枚直趨二十日黎明行至苦棟坪遇賊對戰我兵將百子銃發煩鳥銃噴筒西瓜礮火煉火瓢

齊發黑燄薰天聲震如雷賊眾大敗當陣斬級二百餘顆
各賊抵敵不過倒戈奔命逃入深箐險固去訖二十日收
兵回營屯劄休息就據永順司宣慰彭元錦報稱本司目
兵由巖門渡江前進偵探得地名苦菜關屯有賊兵約三
千餘眾乞速發兵攻剿隨該本職下令遊擊江騰龍陳策
都司吳時喬守備陳九經等各領部兵前去與同永順官
兵奇正迭用二十二日據報官兵奮勇合擊從已殺至申
時賊眾大敗當陣斬級二百餘顆投崖跌死者不計餘賊
俱往箐林遯去陣亡土兵二名殺傷及礮石打傷土兵二
十二名奪獲牛馬給賞被傷兵士祭賽騎坐又發兵攻打

曾家峒當陣斬級一百餘顆俘獲男婦賊仗陣傷官兵查
明另報又據平越路貴州監軍參議張存意督餉紀功參
政郭廷良副使尤錫類參議張文奇呈准統兵征播總兵
官李應祥手本據副總兵陳寅原任參將蔡兆吉報稱奉
令統率土官蒙詔楊治隆張元虎楊燧舍把莫勞守備汪
如淵柳國柱伍萬鍾中軍張奇盛把總吳文秀華統猶鶴
楊通吳守現等漢土官兵於三月初七日前去攻勦四牌
高國龍水國賊眾下國拒敵突戰官兵前後夾攻并用火
器衝擊賊力不支共計斬獲首級一百六十二顆生擒苗
賊三名俘獲賊屬二十一名口器仗八十三件輕重傷兵

二十九名陣亡九名迄今官兵屯劄疆界河內四牌賊首謝朝俸等巢穴及盤據有名險固俱已攻破剿滅合就移報又據報准總兵李應祥報稱參將蔡兆吉於三月初九日自乾坪營由毛坪白龍十二日抵青岡國四面石壁箐林僅有峻路一條賊設險關二層據高瞭見官兵蜂擁前來當該前哨衝鋒把總猶鶴等奮勇接殺當陣斬獲首級二百二十三顆生擒謝王保等二十六名其餘跌崖燒燬不計俘獲賊屬大小男女七十八名口內有賊首謝朝俸第三妻藍氏男謝丑保在內奪回被虜婦女六口器仗二百三十一件又據報准總兵李應祥報稱三月二十一日

檄令副總兵陳寅督率土舍楊治隆中軍孫仲謨等領南丹平州土兵於夜半由構皮灘渡河伏於山後把總陳定等領獨山州兵於袁家渡本鎮親督商民瞻等於水旋渡保靖宣慰彭養正凱里土官楊燧守備伍萬鍾汪如淵於疆界河參將蔡兆吉領把總猶鶴等於孫家渡各該官兵一面敵殺一面搭橋抵夜該本鎮傳令各哨官兵就於賊岸劄營一齊衝殺首尾救應賊眾敗走共斬獲賊級二百二十九顆俘獲賊屬一百二十三名奪獲賊仗九十二件諸葛銅鼓二面奪獲被虜男婦一十七名口輕傷兵三十四名重傷兵五十一名陣亡領兵哨官劉廷宗兵馬長子

等十七名又據貴州監軍按察使楊寅秋督餉紀功副使
洪澄源報准統兵參將朱鶴齡報據貴州宣慰司宣慰安
疆臣呈稱領兵目把陳恩張崑李輔同罵色丁良茂沙卒
等於三月十三日寅時督率各兵分路進取有播賊苗頭
王阿賽督苗把守新關我兵阿秋阿二得等奮勇登壕上
關發弩射死五十七人殺傷四十三人隨發火箭燒關賊
逃深箐我軍破柵平塹決堤取間道破傳頭石壁一帶關
隘又頭目阿五等打破大紅關及兩路口一帶坑塹射退
苗賊阿架等殺死三十四人餘賊俱逃頭目柯阿箇等剋
破胡石口各關攻破黑水關射殺守關眾賊李從正等四

十三人我兵衝傷六名俱同阿秋阿五等兵於本日申時齊到水坎五里臺山口屯劄又據宣慰安疆臣報稱目把陳恩等於十五日巳時攻破板山國射殺賊兵一百二十人苗頭十二名本道義民官李武帶兵併力進國斬苗頭阿王一名苗賊阿二阿右二名俘獲賊兵二名楊冬受鍾宣餘賊奔箐各目登國傳諭召撫在國民戶老幼婦女六百房計一千四百三十五名口隨近聚住待事定安插原業又據安疆臣報稱目把陳恩張崑等於十八日奉楊監軍令今楊應龍父子敵散河渡烏江官兵責令恩等議撥以白牒得蘇魏良海等督兵一枝徑往地名青塘水等路

堵截應龍歸路適於青塘水正遇賊回各目兵截殺一陣
殺死僞內官一人賊頭苗兵一百二十餘人鞍馬五副槍
弩刷刀縣甲腦包八十五件檳榔一搭連生擒張受等一
十九人餘賊萬眾倚箐據險各目兵不敢梭山又據安疆
臣報稱目把陳恩張崑李輔等於十九日夜四鼓賊兵前
來劫營我兵奮勇射殺數多生擒彭四等六名得獲槍弩
縣甲腦包十五件我兵亦多重傷本日又據安疆臣報據
目把柯阿箇阿五陳恩等揭稱各目分兵三哨進攻至楊
亡水遇僞提調楊廷章劉惠領賊兵由兩小路抄出衝擊
我兵大殺一陣頭目阿戶部斬一百五十三人頭目以箇

等部斬賊六十七人苗頭五人雲南武定府頭目李保親
斬苗頭一人部斬苗兵五人餘賊逃箐我兵中傷二十三
人隨卽督兵盡渡楊亡水本日申時兵目俱抵浪頭壩離
落濠水大關三里劄營合行飛報又據安疆臣報稱目把
柯阿箇阿五陳恩張崑李輔等督兵於十六日戰勝楊亡
水進劄浪頭壩聚眾議得落濠水雄鎮前跨深溪後倚大
箐楊應龍設立深溝險塹三層鹿角排柵環築重牆當發
兵一枝由上落濠水抄出樵村一枝由下流蓋山抄金鼓
塘伏下大兵從正路直攻關前舉礮彼此夾攻方可取勝
各目應允回營至夜頭目柯阿箇領兵由上落濠出張村

沙岡頭目那拱等同督兵官領兵出蓋山地平壩偷渡抄出關後三哨各放礮盡發賊兵棄關奔走本枝目兵追趕殺賊三十五人千戶王三錫百戶呂大業姚可興各親斬苗賊一名餘由小路回州訖當令前鋒將一重關門破毀將溪水修搭浮橋我兵盡渡於樵村三哨會合至八里水大水田劄營發兵一枝攻燒桃溪衙後山母氏園發兵一枝出毛蓋山大夫壩與鎮雄兵會合約期分路進攻外看得楊酋恃關疊障倔強負固今照落濛關爲播咽喉險倍各隘賊失落濛是失播矣今本關已被元兇寒心授首可卜也復視其大水田莊宅制度臺沼亭榭營造非常不惟

雕刻彩飾龍鳳等物卽臥房一樣黃色牙牀三十六張欺
僭可知又據烏江路貴州監軍按察使楊寅秋督餉紀功
參議梅國樓呈准鎮守貴州總兵充爲事官童元鎮手本
據鎮雄府土官隴澄揭稱十三日本府督把事王嘉猷領
兵由李稍塘進攻播賊迎敵我兵奮勇殺死苗賊十七名
十四日攻打苦竹關殺死二十五名追至平頂關復戰斬
首三十名各賊奔走上關我兵自午至酉殺死賊頭二名
餘賊三十二名又據土官隴澄報稱本府兵於十六日自
刀靶水移營至雷打鋪陡被賊兵數千截路迎敵前哨各
兵奮勇衝逐殺死三百四十七名各賊敗退徑追過新站

倒戈投降二百五十三名就於本站屯劄至戌時賊復衝
營我兵出敵殺死苗頭阿曲等五名餘賊一百二十九名
擒獲苗賊阿易吐稱應龍知道鎮雄兵至新站隔州不遠
已將兵三萬在大水田埋藏接路先叫我苗兵五千來衝
營是實當將本賊斬訖就經與漢把王嘉猷較議明揚坐
大水田擣巢暗督兵由野里坎陳世田小路破大夫關徑
抵馬坎截其後路去訖除將斬獲苗頭五顆解赴監紀官
驗明轉報各等因到臣該臣會同巡撫貴州兼督理湖北
川東等處地方軍務都察院右副都御史郭子章巡撫湖
廣等處地方兼提督軍務都察院右僉都御史支可大看

得賊自先世以來雄據播州延袤千里踐山爲關扼西北之吭因江爲池絕東南之衝自以爲天險不拔之基誰得而睥睨之者以故肆其雄心日益狂逞東南則破五司之墟略黔楚之境烏江內外湖貴四十八屯皆侵爲播地招引紅腳黑腳生苗居之設爲四牌七牌統制諸所名爲硬手用以戰勝攻取所向無前西北則侵凌綦合百里之外皆以自封立碑定界以爲永業婁山崖門諸關皆極力鑿削陡絕天成自謂可出而不可入也乃諸文武將士憚於陛下之天威激於討賊之大義智謀勇功殫竭無餘競勝爭奇感激用壯坐使畏誅者投戈乞降逆天者駢首就戮

奪其關隘擣其腹心大水田永安莊桃溪衙皆賊所爲世
修莊院僭擬侯王者今且據之焚之蓋已浸浸乎及白田
壩海龍園矣查各路有據關者有入關者祇有偏橋一路
見攻長坎等三關未下其餘業以埽清惟是環播之地山
大箐深未易合哨故不能一擁而至賊巢要之合哨夾攻
當不出旬日之內且臣按閱圖譜賊地關外十六關內十
四今之形勢已覺窮促儻所謂其亡也可立而待者乎惟
是兵形無定兵機多端蜂蠆有毒困獸猶鬪日愼一日曷
敢謂全蓋卽疏內所陳擒斬數百招降數萬各路之功如
指諸掌而臣一不敢爲之敘功祇欲責其成觀其後耳先

是臣有軍令以應援合哨爲急貴州烏江之失安氏之兵居然無恙貴竹人多咎之口語藉藉臣已飛檄切責之而會報功之檄聯翩而至臣亦且勉以後功而不深求其前事蓋亦責其成觀其後之意也統乞敕下兵部案候俟播平議覆施行緣係大兵連破重關漸逼賊國再報捷音事理未敢擅便爲此具本專差承差張問善齋捧謹題請旨

剋破龍爪等國五報捷音疏

題爲大兵抵巢夾攻逆賊據國自保蕩平有期再報捷音
事本年四月初三日起至十八日止連日與賊交戰情形
并所獲功次敬爲皇上陳之據南川路川東監軍參政張
棟督餉紀功僉事徐仲佳報據監紀推官高折枝報准征
播總兵官馬孔英報據參將李經坐營孔繼祖等各報稱
三月二十九日領兵經過白土金子九杆麻壩清水偏崖
梅子等處遇賊對敵斬獲首級三十四顆生擒苗賊四名
俘獲男婦三名口奪同被虜七名口戰馬二匹器械不計
又據參政張棟報據推官高折枝報稱卑職於四月初六

日與各將官督同漢土官兵劄營朗山初七日遇雨霧不
便前進暫劄彼中據哨探兵報朗山口四路山箐有賊埋
伏隨會同馬總兵發各營彊悍遊兵前去各箐攻打各苗
四出拒敵我兵奮勇當陣斬獲首級一百一十六顆生擒
頭目李旭姪李夏保并張洪夏坤羅保四名俘獲幼男婦
女二十口牛馬一十九隻槍刀弩箭不計輕重傷兵二名
又總兵馬孔英報據宣撫馬千乘冉御龍長官鄭葵楊通
榮楊光祖千戶羅人傑提調劉勝把總冉大周等報稱四
月初八日兵至長灘飛木羅水滴水葫蘆高坪等處劄營
遇賊伏路截糧我兵奮勇追殺當陣斬獲首級共一百四

十二顆生擒苗頭三名又據總兵馬孔英報稱十一日兵
劄木水賊先使許瑤趙天澤詐降本職會同高推官審出
斬於令旗下料賊夜必劫營卽令宣慰冉御龍先去路口
伏兵以待至三更時分賊果衝來酉陽兵起當陣斬殺五
人賊驚退回酉兵衝出趕過高坪至明發毛兵接應徑到
海龍壩又殺死三人本職隨督將領等官周國柱金汝卿
馬騰霄馬如繡馬吉蔣尙仁李桂芳白時化鍾允升等馬
兵宣撫馬千乘等士兵一齊勇猛殺去直至海龍囤養馬
城當陣斬獲首級并生擒二百餘賊墜跌林箐者不計其
數衣甲器械丟棄不顧斬級數內多有頭人隨卽收兵卽

劄衝路處所按兵以待又據總兵馬孔英報稱十七日約永綦南川兵同日攻固本職卽會高推官并將領等官周國柱等先發酉陽平茶延綏兵從土地壩竟攻養馬城甯夏石柱固原劉勝毛兵邑梅兵從喇叭水起水西營前攻海雲固至午酉陽延綏兵殺入養馬城賊第四層關外賊眾奔潰殺死射死銃礮打死者不計其數酉陽兵見勢孤先退延綏兵亦退攻賊乘勢趕來殺亡延綏兵六十餘人傷者三十餘人失馬百十匹酉陽亡七人傷四十人固原兵甯夏兵與石柱等兵遂劄喇叭水不動監軍道於是日晚卽傳令喇叭水兵候天明再攻至十八日辰時石柱兵

劉勝兵平茶邑梅兵毛兵從喇叭水由林箐轉上土地壩
攻進海崖關連打破險關四道殺至海龍囤徑上養馬城
養雞城賊始大奔除二日斬獲功級三百餘顆并生擒投
降者無算俟查的另行再報又據參政張棟報稱本道由
清溪進營一帶地方苗民各因大兵經過畏誅逃避山箐
潛住該本道差土舍李世爵把總戴明玉等分投招撫節
據桶壩南坪黎村大灘芙蓉長礮等處招降苗民僧人余
嘉鑾傅明啟劉茂元等男婦共計一千零四十餘名口又
據綦江縣報稱招撫過被虜民文燦等男婦三十二名口
宣撫冉御龍土舍楊通達各招降過播民僧人王政俸馮

善道晏子榮性通等男婦共三百一十三名口又據合江永甯二路川南監軍參政謝詔督餉紀功副使史旌賢參議劉一相報據監紀知府蔡宗憲州同知趙世德報准鎮守四川總兵官吳廣報據原任副總兵曹希彬參將吳文傑遊擊司懋官都司吳從周封建趙應科報稱四月初一日寅時漢土官兵剋破崖門關永甯一路當陣斬獲頭目楊保及壯苗首級一百六十九顆合江一路斬獲壯級一百二十六顆奪獲器械等件不計又據提調張曉報稱督率永甯司目兵彭受等於初四日攻打李伯牙大國當斬掌固逆賊楊六等壯級七十一顆追進入箐棄戈投降男

婦一千名口又據總兵吳廣報稱兵至水牛塘五臺山及養馬城前棋布營柵與龍爪海龍二國對劄初四五六等日賊分三路每路約二萬有奇連來挑戰我兵迎敵屢戰屢克擒斬多功至初七日酋發三人投文求降窺瞰營壘本鎮預料其詐傳諭各營官兵倍常堅壁謹備初八日早逆賊之子楊朝棟大集賊兵三萬眾蜂擁前來拚命直衝各營本鎮隨令各兵守營者守營接戰者接戰副將曹希彬等各領兵奮勇殊鬪或衝其前或擊其後自寅至未血戰數十合各賊倒戈大敗當陣斬獲首級四十五顆鳥銃打傷不計投竄深箐者難以枚功奪獲槍弩等器七十餘

件陣亡哨官一名重傷兵六十名輕傷一百餘名今我兵已劄龍爪圍腳下去海龍圍不十里矣環市賊壘勢在虎背及觀圍下晝夜皆布帳旗列甚多自本日大敗撤兵回圍布帳盡捲無形變詐莫測又據總兵吳廣報稱四月初一日攻破崖門關初三日剋入龍爪圍右劄營水牛塘初八日與賊血戰監紀蔡知府督馬湖兵出奇應援敗走官兵乘勝追焚龍爪圍賊俱竄匿酋卽上圍訖至十六日本職與劉總兵會議酋多詐謀海龍圍須候各路兵齊刻日並進但養馬城爲圍藩籬四面深箐賊必埋伏堵截應先勦滅以便合攻遂於十七夜密令中軍官鄭子龍傳諭坐

營都司趙應科及副將曹希彬吳文傑封建司懋官吳從周江萬化周大謨等於十八日寅時督率漢土官兵直擣養馬城賊果據城拒敵四山埋伏內衝外包我兵進攻或當其鋒或邀其伏本職同蔡知府督兵策應士氣益奮戰不移時攻奪其城斬級不計又據參政謝詔報據督陣旗牌官虎文蔚報稱十八日攻破龍爪囤養馬城鐵柱關三處見將海龍圍住中軍鄧起龍亦報稱十八日攻破養馬城起龍領兵攻左路南川攻右路劉總兵攻中路直抵鐵柱關酋勢窮力迫指日可擒合行飛報又據綦江路川東監軍參政張棟督餉紀功參政張文燿報據監紀同知

史朝貞報桂原任南京右軍都督府署都督僉書今充爲
事官劉綎報據領兵指揮杜熊兆報稱三月二十九日統
督太平石砬土兵并千總提調吳世景黃惟中等入婁山
關攀緣登險攻打石子園隘口設排柵五層立敵樓三座
弩槍下發官兵奮勇排闥而入各賊遮攔不住奔二層排
柵又奔三四層排柵剋破直擣當陣斬獲賊級二十三顆
生擒九名俘獲賊婦二十口招降高志經等一家男婦七
名口奪獲馬牛一十六隻槍弩三件又據總兵劉綎報稱
本職自三月二十九日剋破婁山關以來復取石子園招
降香爐園暫劄白石口永安莊至四月初三日逆賊父子

統領諸苗抄由小路四面衝來官兵迎敵與之鏖戰大敗而回我兵乘勝進劄四渡水迺酋今見南川之劄高坪永甯之進水牛塘本職之據關子山與賊抵固爲壘聲勢震天燈火相照酋則竄身無地一連投文三角猶爲虛文請命之辭圖緩我師遂令遊擊周敦吉守備周以德徐珊等挑選勁卒於初十日由贏子崖直抵海龍固前賊果撤抵不及爲官兵直搗斬獲功級一十五顆俘獲男婦二十餘名口奪獲牛馬三十二隻器械三十餘件招降過男婦二千有奇又據總兵劉挺報據遊擊周敦吉報稱十八日子時奉令分發三路官兵奮勇大戰得獲龍爪固前兵據關

迎敵各職分投打進銃礮震天勢如破竹其望軍圍海雲
固一鼓齊下復攻至養馬城又聚兵迎敵官兵死戰連鬪
數十合直追到水關打破養馬城又攻剋龍鳳關海門關
鐵柱關養雞城又奪獲海門關牌鑰官兵勢大難止欲乘
勝追上海龍固但天暮收兵就彼劄營本鎮親自調度相
機暫守此戰擒斬甚多奪獲頭畜無計并被傷官兵通候
查明另報今將牌鑰一併解報又據指揮傅朝政報稱招
降過播夷穆煜下男婦二百四十五名口把總何忠等招
降過播夷一十七戶男婦共計七十六名口指揮杜熊兆
招降過播民李朝相等一十八家男婦一百二十七名口

石柱兵陳燮等招降過播民王耀等五家男婦七十名口
又據偏橋路湖廣監軍按察使胡桂芳參議魏養蒙督餉
紀功副使王應霖呈准鎮守偏橋總兵官陳璘報據守備
白元潔報稱統領五司土兵於三月三十日前去湄潭哨
伏瞭見青蛇碼礪長坎各囤馬步苗賊約有三四千下囤
蜂擁過河卑職挺身統帶部兵不滿一千前去迎敵我兵
奮勇將火箭銃礮弩箭齊發殺至長坎囤下打死穿紅執
旗馬賊二人斬獲首級二十二顆餘賊不計其數賊將馬
賊二人身屍鈎搭馬上去訖又據總兵陳璘報據遊擊江
騰龍陳策都司吳時喬守備陳九經白元潔等報稱四月

初八日兵至湄潭目擊七牌賊徒盤據青蛇碼礪長坎保子各國峭壁插天巢壘碁布等因到職又調取戴罪守備楊惟中帶兵前來復思各國左通三渡右連板角國國相連互相雄峙若同日並攻限於兵力若向攻一國則三國來援再三籌度務求其可遂行副總兵陳良珪都司錢中選督發指揮把總劉之屏梁廷祿等官兵在於荆條流河渡取道前至國後夾攻又行參將王一桂督官兵將板角關謹守以防各賊奔逸初十日喚集大小將領密授方略及懸以衝鋒重賞分別奇正安置已定先遣守備楊惟中白元潔陳九經各選膽勇官兵夤夜竊至國腳左右埋伏

十一日卯時本職親督遊擊江騰龍陳策都司吳時喬各領部兵并新到守備李大諫帶領家丁鼓譟而進各賊蜂擁下固迎敵連戰數合當有把總戴宗茂朱萬乾等冒死衝鋒各斬一賊卽時各賞銀牌十兩奇正官兵四路衝殺斬級一百餘顆其餘退固天晚收兵一更時分復發陳九經等仍去埋伏又發兵一枝堵截青蛇固以防助戰十二日早本職復督官兵齊力夾攻長坎礪礪保子三固各賊仍前拒險死敵木石如雨廣兵把總吳應龍李元敬吳嘉寵等拚命向前被石壓死復將銃礮亂發各賊墜跌深崖不計其數我兵大勝攻破險固斬級四百餘顆餘賊遁入

深箐難以窮追除將功級賊屬賊仗井木石滾壓箭銃傷死官兵通候查實及青蛇岡爲四圍之最險者俟圖另報間就據策應副總兵陳良玘都司錢中選報稱奉令督發指揮徐時達劉之屏把總周廷祿梁廷祿李廷機土官田應瑚等各率兵四路攀緣上攻與賊抵敵被賊連放礮木梭杆矢石如雨從辰至申驅兵舉放火籠火箭百子銃傷賊數名我兵二營奮勇輕身斬關上岡交鋒當陣斬獲首級一百九十一顆十二日賊從山箐衝出我兵奮勇向前大殺數陣斬首二百一十五顆十三日偵探各賊聚劄岡後深山職等率兵直搗彼處交戰又斬首一百一十七顆

通共五百二十三功俘獲男婦一百六十五名口奪獲器械一百八十九件陣亡官兵四員名重傷一十一名輕傷四十八名又據總兵陳璘報稱七牌湄潭播黨盤據保子長坎礪礪青蛇素稱險固我兵相持半月因見青蛇一固懸崖峭壁險自天成從前直上險峻難登從後向擊無路可達晝夜思惟未能畫策遂下令分兵扼守青蛇於十一十二連日先攻保子長坎礪礪翦其羽翼一面厚購死士十三日一更時分密導守備陳九經白元潔廣營把總吳應龍朱萬乾李元敬等兵從礪礪後山披荆翦茨附葛攀崖竊至青蛇山後又令遊擊陳策守備楊惟中李大諫督

把總葉占春等領兵一枝從國前江騰龍督把總周思瑾等并永順目兵從國左都司吳時喬督把總向日葵等并保靖目兵從國右列陣圍劄俟國後奇兵舉礮然後夾擊十四日午時後路兵到放銃吶喊前路官兵銃礮齊發各賊倉皇迎戰斬首數十級敗奔入國申時直逼國腳銃礮勁弩射死無數賊斬木棚礮石傷我官兵各兵奮力用挨牌竹筴抵當木石衝薄排柵腳下斬去二層天色已晚分兵周圍劄守二更時分向後衝逃被伏兵殺退回國十五日自辰至午連戰十陣斬二百餘級各賊固守我兵遂用發煩百子等銃火箭火輒噴筒等器攻破國後守備陳九

經白元潔等挺身白刃血戰先登前路統兵遊擊陳策江
騰龍都司吳時喬守備楊惟中等永順宣慰彭元錦舍把
彭宗惠彭勉忠張良弼保靖應襲土舍彭象崑督漢土官
兵并守備李大諫帶領家丁由前路斬入四面擁進賊勢
大敗斬首一千餘級是固也險峻非常破之不易相持半
月夷滅一朝是皆仰仗天威致各官兵有進死之榮無退
生之辱而始剋之除將斬獲功級賊屬器仗與陣亡陣傷
官兵等項俟收兵查實另報又據總兵陳璘冊報自三月
十九日渡烏江起至二十九日止陸續招撫過苗民一百
九十一家男婦共計六百八十名口又據龍泉路湖貴監

軍參議魏養蒙張存意督餉紀功副使陳與相路雲龍報
據監紀推官吳天佑知縣鄧宏烈報准總兵陳璘報據參
將王一桂報稱指揮唐一麒於四月初九日同督陣官岳
志德等統兵前去播地哨探行至川崖有賊頭田良玉領
兵數千迎敵我兵奮勇追至青山固賊兵矢石如雨官兵
一擁攻打上固斬獲首級數多查的另報我兵重傷二名
輕傷五名又據指揮蔣從賢報稱督同千把總唐顯威李
佑薛瑞等領兵進至黃沙固被賊衝敵我兵奮戰共計擒
斬苗賊五十五名顆俘獲男婦一十二名口投降男婦三
百九十三名口奪回被虜男婦七十一名口取出偏橋衛

荆條等屯原被播賊拘阻軍餘男婦四百三十名口槍弩
兇器一十二件僞受餘慶司土官毛宗賢青絹傘一把又
據參議魏養蒙報准總兵陳璘報據副總兵陳良珌守備
陳九經督千把總鄉導吳嘉隆周思贊李佩等招撫過四
牌七牌小水浪乾長坎平壩水尾火燒等處投降苗民張
四蔡向陽方華石廣富崔朝現胡勝貴趙正方薛萬祿文
興枝等男婦共一千三百一十八名口又據參將王一桂
報稱招撫過播目楊統下弟楊海并妻妾子女一百零三
名口又據烏江沙溪二路貴州監軍按察使楊寅秋督餉
紀功副使洪澄源參議梅國樓報准貴州鎮守總兵充爲

事官童元鎮參將朱鶴齡報據宣慰安疆臣報稱漢把王
嘉猷陳恩等前同鎮雄府土官隴澄連破苦竹關石子關
直抵賊巢大水田屯剗至三月二十九日逆賊楊應龍因
見鎮雄斬其來使首其餽儀遂盡起該司苗兵七萬父子
親領由高堽固前來拒敵該水西鎮雄合兵從辰至未與
賊大戰斬殺頭目五十餘人內有僞內官五人各路共殺
賊兵萬餘其餘奔潰乘勝追赶上固入箐四散去訖所獲
被甲槍刀不計其數我兵損折百十餘名重傷三百餘名
及據監軍楊寅秋呈據鎮雄府土官隴澄揭稱三月二十
六日據無知頭目引播差二人齎書儀并羸二匹赴營投

見當拆來書驗係楊應龍妻田氏餽送下程禮單該本府
看得楊應龍父子罪逆滔天大肆兇殘本府奉命征討誓
在擣巢擒斬以謝天人焉敢私受汙名以渝臣節除將引
進頭目細打四十將來使二人斬於營門懸示并傳諭大
小三軍同心戮力共擒兇殘外今將餽送羸子二匹金盞
銀臺一副折程儀二十兩著段二端并原禮單差人齎上
乞賜驗明貯庫以白此心仍乞通知諸路將領各摠忠赤
進剿又據該府押解生擒賊犯二名到職審據二犯供名
羅才羅慶播州大夫壩住從海龍國下來有管勾差他探
聽水西營兵若干被鎮雄探兵拏獲有應龍差小童吳比

金萬富等前來鎮雄送禮物當將吳比二人梟斬是實等情又據督餉紀功副使洪澄源呈據宣慰安疆臣申稱本司兵住大水田賊龍戰敗之後查有心腹提調尙義黃繼枝管督板山落潮馬站一帶苗兵前三月二十九日於高垵母氏國交鋒二賊亦在衝鋒該本司用間諜之計許令尙義黃繼枝來營計議退兵賊龍同妻田氏果信隨差二賊并坐寨頭目夏文茂及從黨張元等共二十四人齎降文一角禮單一封金臺盞二副折段銀八兩鞍馬二副槍刀弩箭等項到河除伏兵於河口將二賊并從賊擒拏審實同原禮器械降文鞍馬批差漢把李輔領解告投外看

得尙義黃繼枝名充提調心實豺狼向與應龍父子內處
心腹之任外作牙爪之威自渠爲患以來飛練綦江東坡
龍泉皆其謀孽烏江河渡等處皆其衝鋒至於酋之巨細
事機又皆其內參外贊故知酋黨雖多此二豎則黨中之
稱最者也先奉院道密諭心切遵承一向不能如意今仗
計獲迺其罪盈惡極以致生擒天寶奪其應龍之左右手
矣等因申解到道覆審得播犯尙義黃繼枝委係渠惡楊
應龍父子心腹夏文茂張元并隨從二十一人俱皆酋黨
今幸計擒應合解審除將各犯并禮物鞍馬解赴貴州兩
院審驗外理合呈報又據平越路貴州監軍參議張存意

督餉紀功參政郭廷良副使尤錫類袁應文參議張文奇
呈准征播貴州總兵官李應祥手本報據副總兵陳寅報
稱三月二十四日撥發隨征官兵包佑等伏路擒獲唐榮
智等稱係偏橋毛坪屯軍本屯男婦約一千人遭附播白
泥司土官楊正邊楊通漢父子凌虐痛害榮智等皆欲陷
其皮骨伊弟楊正愛屢諫不從願爲內應職審非詐於二
十六日令中軍孫仲謨旗鼓徐一夔等於二十七日夜唐
榮智等先入賊營吹角爲號官兵一齊擁入時楊正邊正
在鼾睡被伊弟楊正愛同榮智等將正邊并妻宋氏男楊
通漢俱縛又斬首惡楊七部下黎金六等首級四顆正邊

所屬男婦三百餘名口本屯男婦九百一十三名口隨帶牛馬乞降分發都勻獨山等處安插及該總兵李應祥看得白泥司土官楊正邊與男楊通漢白宜恪守世土納糧當差迺敢糾同楊七楊珠投附叛惡楊應龍攻圍偏橋殺虜東坡紫金關打蕨等寨翁聳等屯流毒最慘擢髮難罄至於楊通漢年質雖幼馬上便捷如飛偏橋興隆人號白鶴子及肘鎖押出營門而通漢猶說可惜我在地下被拏據其言語狂悖乃見心性兇殘隨將楊正邊父子解貴州撫院轉發按察司監候訖又據監軍張存意呈准總兵李應祥報稱疆界河邊播州老鷹岡固首石勝俸王志虎王

志龍等率妻子萬餘人來降本鎮傳諭朝廷令不殺降但黃灘關未拔汝等果是真降須生擒守關頭目立功贖罪勝俸等磕頭稱願效死力等語十二日寅時據衝鋒官兵張奇勝李師沆吳文秀朱世臣王嘉倫商民瞻汪世才杜廷武易之謙土官楊燧等領兵齊渡黃灘河攻其關之前新降播目王志虎石勝俸王志龍王賓王倫尙習中等馬步兵由墳林暗渡河襲其關之後從辰至午大殺賊敗追蹙至張王壩透出關二十里至晚收兵李師沆當陣生擒有名首惡王大安張奇盛生擒首賊王愛官兵通共擒斬賊級八百五十六名顆奪獲賊屬牛馬被虜器仗輕傷重

傷陣亡兵士通候查明另報又據爲事官蔡兆吉報稱招降過苗民男婦邱伯芝徐受等一百八十名口各等因塘報到臣除將擒斬功次聽紀功官驗明復解按臣覈驗陣亡軍兵隨宜優恤俘獲投降男婦人等轉行守巡該道分別安插外該臣會同巡撫貴州兼督理湖北川東等處地方軍務都察院右副都御史郭子章巡撫湖廣等處地方兼提督軍務都察院右僉都御史支可大巡撫偏沅等處地方提督軍務兼理糧餉都察院右僉都御史江鐸看得賊之甘心造逆也自以爲撫千里之雄封據河山之極阻加以鄰比相助狐兔情深卽王師進剿其如我何一戰勝

之當且灰心從而養威蓄銳乘時鵲起天下事一何可知
哉何意於今而大謬不然也自四月初三日以前各關俱
破蜀兵進入關外未下者長坎碼碯青蛇三大國耳保子
等國不足言也乃今而盡爲陳璘攻破矣施州兵久破板
角關直候璘至同入平越兵亦以孤軍難進且蠶食於黃
灘關之外今黃灘亦破且擒斬多人計三關者不日相率
同入關以外無復著手處矣乃蜀兵自入關之後更番迭
戰賊每不支初八日永合兵破之於水牛塘十二日南川
兵破之於高坪十七十八日蜀兵盡會南川路衝鋒奪關
綦合二路繼之因破其龍爪固養馬城海雲固直擣其鐵

柱關而連營其下以逼之計賊所有止一海龍國直據之以苟活旦夕耳初賊結好水西比事起時時以唇齒之說動之水西意不能無惑而惕於天威又不敢不出兵相角顧其戰不甚力也烏江之事眾多蜚語臣移檄詰責之水西不自安矣而會賊偶殺其接山之頭目陳起禮者隴澄大恨之賊且差人備禮謝過澄遂立斬其使於營門賊憤甚卽治兵相攻大衄而去先是臣令安疆臣絕播州之交疆臣強應之實未絕也臣謂監軍楊寅秋日疆臣實絕播州者可執尙義黃繼枝來蓋二人爲沙溪頭目賊所用以通安氏者至是疆臣欲執之以取信旣戰之後因謬爲好

語謝之求敦前好賊雖疑之然意幾得復行成也遣二人並二十餘人往疆臣盡執之自是二氏之交絕矣此亦天之所以亡楊氏而保全水西令其以忠順永世也國爲險地亦爲絕地川兵已壁其門湖貴兵至四面攻之卽欲爲假息遊魂曷可得哉除再催各路官兵刻期會哨四面夾攻上緊破固擒賊捷音至日另行具奏外緣係大兵抵巢夾攻逆賊據固自保蕩平有期再報捷音事理未敢擅便爲此具本專差承差郭榮祖齎捧謹題請旨

六報捷音疏

題爲官兵攻固賊勢已窘再報捷音事本年四月十九日起至五月初十日止連日與賊交戰情形所獲功次敬爲皇上陳之據合江永甯二路川南監軍參政謝詔督餉紀功副使史旌賢報據監紀知府蔡宗憲同知趙世德報稱四月十六十七十八等日原任副總兵曹希彬參將吳文傑率領提調官張曉井永甯長官彭受王輔松張嵩劉國用等督兵攻打大洪關大山箐又會合綦江官兵分路攻打養馬城追至海龍囤腳下當陣斬獲首級共二百五十一顆二十日參將吳文傑督兵攻固行至樂搖地方長官

劉國用擒獲黑苗李金華傅朝書二名供稱楊酋發提調
鹿罕父子領惡苗千餘在國後洗衣塘大山箐上把截等
語二十一日黎明官兵齊至前箐直衝賊營鹿罕父子率
眾拒敵我兵四面奮勇斬開木柵劉國用當陣親斬鹿罕
劉謙親斬罕子首級提調郭天俸等斬獲賊級共計百餘
顆賊奔山箐二十二三等日副總兵曹希彬參將吳文傑
遊擊司懋官都司趙應科守備江萬化督領千總鄭子龍
鄧起龍提調張曉長官袁初等追賊至永靖關當陣斬級
共一百零九顆陣亡隊長一名輕重傷兵數十名又據知
府蔡宗憲報稱二十四日賊詐傳次早遣叔求降該職遵

照密諭不許聽信詐降卽會同吳總兵傳令後山永合將
官整兵聽令夾攻二十五日卯時賊果遣叔楊永用詐稱
二十九日酋妻田氏出降等情職同吳劉二總兵當將永
用立斬關前懸首固左賊卽擁眾出戰我營放礮爲號馬
湖土官文安民悅天恩等率兵奮勇攻打衝破鐵柱朝天
二關斬獲首級二十五顆又據副總兵曹希彬報據長官
張嵩劉國用報稱五月初二日兵至地名銅鑼關忽見賊
兵一夥由箐林突出迎敵我兵奮勇衝殺當陣斬獲領兵
頭人一名并散級一十三顆餘賊遯去彼時在頭人身上
搜出硃票一張知係有名賊首趙仕登弟趙仕眞首級隨

三才圖會卷之四
三
喚降人識認果係頭人又據參政謝詔報准副將曹希彬
參將吳文傑報稱五月初十日寅時分布永合漢土官兵
及會畢節道并朱參將令催水西土兵分投四面夾攻仍
同部院旗牌督陣等官分哨嚴催齊上監紀趙同知周副
將羅遊擊同一職并守備江萬化周大謨坐營孔繼祖武
舉薛來徹吳登光臨陣監督自寅至午不剋二職示諭三
軍有能攻奪山頂者賞銀五百兩登國者賞銀五千兩隨
將解道懸賞銀內動支五百兩當陣分給漢土官兵鼓激
先登各兵踴躍倍勇衝殺礮手以滅虜大礮火器排列放
打戰至未時賊兵勢靡敗潰我兵乘勝先奪朝鳳險山追

殺直逼賊門尙在交戰除將衝鋒登險漢土官兵姓名并擒斬功級另行查敘又據南川路川東監軍參政張棟督餉紀功僉事徐仲佳報據監紀推官高折枝報准征播甯夏總兵官馬孔英手本報稱四月十三日酋差從弟楊順龍假名詐降被朱應元認出拏解到職會同高推官細審供係逆酋楊應龍差出詐降窺探我營中事情并供同差姦細尙多因是於各營徧索又獲一十六名俱審的確時聞楊酋欲夜劫營留之必爲內應同楊順龍隨押赴令旗下斬首訖十五日又據播目田良玉赴職投見稟稱原約逆賊妻兄田一鵬等五十一名內應舉事先差親屬楊光

耀密出投赴高推官審羈營內聽候行事不料擬十八日
舉事分殺楊珠楊明等計洩良玉等連夜緣固而下徑來
投順其餘逃散又據參政張棟報據推官高折枝報稱十
七十九至二十四等日各營漢土官兵剗營海龍固養雞
城與賊燈火相照恐兩山箐林有賊埋伏發兵接捕及連
日用大將軍滅虜銃礮衝打進城賊從內突出我兵奮勇
衝上與賊大戰當陣斬獲壯級共三十五顆銃礮打死不
計其數餘賊奔同上固我兵追至固前鐵柱關被賊滾木
礮石弩箭射打陣亡兵四名輕重傷兵二百二十六名二
十五日發兵攻固有我南川一路官兵直衝固之前門用

銃礮衝打攻破酋之鐵柱飛龍二關斬獲功級查明另報
又據參政張棟報稱屢奉本部院憲牌切責攻圍因自五
月初二日至初九日晝夜大雨乘雨難動會同分守道張
按察使行各營製造挨牌雲梯已備原約但晴各路四面
夾攻初十日辰時雨止馬總兵率李參將任遊擊哈都司
萬守備督陝兵西陽石砦平茶毛兵劉勝兵與高推官分
布本路兵在關前攻打劉總兵率標下守備周以德李爲
瑚徐珊千總易朝臣莫如爵等兵與史同知分布本路兵
在前左攻打吳總兵在原占左山與本道守道蔡知府在
上發吳從周兵浙兵在山下攻打關左城外山坡周國柱

羅星率陝兵及駱有餘晏朝海漆太然兵同曹希彬吳文傑杜熊兆等在後國領大礮邊兵永甯兵廣兵及畢節道洪副使督水西兵一併攻打國後礮聲振天前左右三處一時攻打賊四面受敵力不能支午時後隨報國後兵奪取圓山賊營三座直抵後門把守我兵卽移圓山劄營安立排柵前關石柱兵當前馬總兵千總馬積冒傷先登鐵柱關正樓之側左水關樓則劉總兵部兵先登賊大敗走打死甚多爲嚴令取關卽拆牆燒樓不取首級多被拉去二樓一時俱然順風煙衝國上滿國哭聲震動山谷是役也雖未得國足寒賊膽可疑刻期奏功而劉總兵親在槽

下四門烏銃供伊射打賊死數多面腫一泡又自登關城
調度燒樓拆城殆親冒矢石矣此本道親見恐各營所報
異同故先撮大略馳報查先破水關鐵柱關蓋止到關下
或登城復出而賊猶然有關今燒樓潰牆賊始失險擬越
三十六步急攻飛虎關賊逼倉忙固後可入又據推官高
折枝報稱南川路官兵攻鐵柱關斬首二十餘級攻後固
奪其三山斬級五顆餘尙未報又據參政張棟報據原差
方時中等前去趙家里銅鼓坪木窰黃魚江官莊等處招
出降民頭人吳先照等二百一十七戶男婦一千七十四
名口又據邑梅司領兵長官楊正輝報稱奉文護餉差舍

把田應穩等率兵於風坎山小遞溝二處林箐內搜獲播
民張伯春等三十六戶男婦二百零八名口僧人廣明等
三十六名又據推官高折枝報據宣撫冉御龍報稱發兵
一枝執旗前至地名金川壩養老欄炭局招同上年六月
播賊殺虜綦江民生員陳鳳鳴陳三策并已故舉人周盾
宗妻萬氏等計家二十五戶男婦女共四十五名口到營
隨差典史蔣繪押同原籍給各親屬收領完聚訖又據綦
江路川東監軍參政張棟督餉紀功參政張文燿報據監
紀同知史朝貞報准總兵劉綬手本報稱職於四月十七
日率兵三路攻打海龍圍至十八日據遊擊都司守備干

把總周敦吉奈世威羅星趙賢輔哈光顯周以德徐珊劉光漢吳英李爲瑚王九思劉可春熊俊等各報稱與賊大戰數十陣攻破賊柵十數層先登奪獲龍爪養馬木杉望軍海雲龍門等城關圍斬獲首級共四百七十顆生擒十名當陣投降二十三名俘獲男婦二百八十三名口奪回被虜一百二十八名口器械一百三十七件牛馬二百二十九隻陣亡兵八名重傷官兵二十四員名輕傷五十七員名陣傷馬三十六匹射死馬二匹俱令獲功員役解赴紀功道覆覈訖又據遊擊奈世威報稱二十五日奉令統領各營兵馬攻打鐵柱關官兵奮勇打入關城有總提賊

兵頭目楊珠統賊截路來戰本職排佈大礮喊殺一舉將楊珠打死又據總兵劉綎報稱得獲小男八元十生二名各稱是日楊酋見得關前左邊官兵攻打得緊喝令楊總管統軍殺出那時楊總管纔到陣前就被官兵當心一銃打死擡進去了等情及照本職是日督兵攻打之時各營監紀官俱見一賊身披銀錢黑甲被我兵一銃打死移時據日本九兒稟稱打死披銀錢黑甲一頭目賊眾難以找級今據八元十生所報正與前稱在陣打死頭目脗合及詢生擒黎甫明等執稱內總管係是楊珠管理內國兵馬爲楊酋手足今被打死黨羽漸除成擒有日又據參政張

文燿報准總兵劉綎手本報稱五月初十日該職親督遊擊周敦吉守備周以德徐珊李爲瑚千把總劉招孫劉興勤曹柏等官兵奮力攻打銃礮震天賊下梭杆滾木礪石死敵我兵以竹木挨牌遮護并用雲梯一擁齊上攻奪鐵柱關掀挖城垣五處每處約長五六丈燒燬三層城樓二座房屋數處仍分千總吳英合哨南川兵攻圍前門一面分兵攻打飛虎飛龍等關見該二道井監紀史同知親在陣前監督彼日後山三路官兵與陳總兵及貴州漢夷合攻已奪三山攻破土牆二層天晚收兵同營標下官兵斬獲功級三十七顆陣亡兵五名被傷五十二員名行令獲

功官兵解赴贊理監紀史同知查驗轉解覆覈卽今賊勢窮迫又據偏橋路湖貴監軍按察使胡桂芳參議魏養蒙督餉紀功副使路雲龍詹啟東王應霖陳與相呈據監紀推官吳天祐知縣鄧洪烈報准鎮守偏橋總兵官陳璘手本報據領兵原任守備徐允爵報稱職劄九杵四月十一日奉令帶同官兵進攻白田壩行至中途遇賊埋伏箐林之中覷見我兵經過四面齊起截拒我兵舉號放銃前後圍轉應援血戰三次共斬首三十七顆又據副使路雲龍報據推官吳天祐呈准指揮胡效忠關稱十三日督兵前去攻打羅安水至新上藍坪楊酋差人帶兵般運家財皮

箱上國身背黃包袱撞過來追本職開弓一箭射中倒地
有弟胡效尹義子胡加官斬取首級奪獲包袱把總楊昌
連等共斬首級一十五顆本職又擒苗賊一名包茶奪獲
兇器十件牛馬三十隻招出降民熊可仁下男婦五十六
名口當將包袱對眾開驗內紅袋一箇彩龍紅筒裝有玉
璽敕命一通等因到職隨將解到首級逐一驗明外開閱
敕命係洪武十七年七月初二日頒給播州宣慰使司蠻
夷長官楊允中及查楊允中根因據播民何邦道供稱播
州初時設有隨司辦事長官四十八員止有龍話無地方
無印信楊酋盡廢舊制或係收藏又據副總兵陳良玘報

稱十七日據偵探飛報巡警朱敬領苗數千嘯聚青山園
箐候兵進關包截等語職卽督令指揮劉自西等領兵一
枝前去攻截十八日朱敬與我官兵交戰大殺兩陣當有
土官向日明部下土兵楊啟祺吳八一奮勇衝鋒向前將
朱敬當胸一槍隨有土千戶張銘下土兵吳老四斬獲首
級奪回摩鎖盔甲一副護項一箇銀廂大小刀二把煖肚
一條護膝一雙翰鞋一雙標槍一杆紫馬一匹吳老四等
乘勝追殺又斬頭目賊級三十餘顆陣亡兵一名被傷兵
三名隨據部下把總楊騰龍等識認委係朱敬首級又一
顆係謀士李旭弟李深首級按有楊應龍給票一張俱係

緊要有名首惡又據總兵陳璘報稱探得大小三渡兩關相離不遠俱結石爲欄架木爲樓樓下一門僅容旋馬兩山峭壁險阻難前遂卽召集將領遊擊陳策守備白元潔都司吳時喬等前去攻打就將原解軍前銀兩懸賞下令二十三日夜督發各兵銜枚前進二十四日寅時各到關前舉礮爲號齊聲吶喊打死賊人數十名賊卽退回據關亂放礮石自卯至巳兵不能進遊擊陳策覓一小徑攀藤左上各兵躡尾而去賊弩亂發陳策身被數箭盛甲堅厚幸不重傷家丁陳勝奮勇向前斬級二顆都司吳時喬爲事守備楊惟中又從右山督兵懸崖前進兩軍相對賊力

遂分本職卽督守備白元潔陳九經率廣兵中道擁進三路銃礮齊發打死數賊斬開排柵賊遂敗走我兵乘勝追至第三關第四關賊勢大敗斬首三百餘級據關劄守又據遊擊江騰龍差人飛報本日寅時依令攻打小三渡關因關口闊僅三尺難以向前隨令採取茅草填壓又令守備李大諫由左山之棟由右山各取小徑兩面夾攻本職督兵在前併力攻破關門各賊披靡乘勝追殺斬首二百餘級餘逃深箐又據平越路貴州監軍參議張存意督餉紀功參政郭廷良副使尤錫類袁應文參議張文奇報准征播貴州總兵官李應祥手本報稱四月十二日官兵

攻黃灘關而三渡關遁楚師進播門戶一名曰渡上關距黃灘關三十里偵得播賊楊應龍差坐寨陳胡保張貴鑾等賊眾拒守隨喚降人石勝俸王志甫王賓等商計指點路徑甚悉遂卽選標下精銳募兵三千同石勝俸等馬步夷兵千餘連夜發行十三日五鼓官兵一枝占住後路石勝俸等數十騎從前門叫說被官兵追來投奔等語比及開門被我兵前後掩襲當陣李師沆生擒陳三保張奇盛生擒張貴鑾各部斬首級共一百一十八顆生擒二名奪獲馬九匹賊仗一百三十一件俘獲賊屬二百八十三名口輕重傷兵五十九名陣亡九名又據總兵官李應祥報

稱探得望鄉國賊見剋渡上關據險添兵死守本職當集
蔡兆吉伍萬鍾等遣把總猶鶴杜廷武部兵合降民石勝
俸王賓等兵爲前鋒把總吳文秀等標兵尋徑抵國後防
賊奔逸十八日夜發兵十九日五更齊至攻上賊巢前後
大戰從寅至午賊力不支潰敗官兵通共擒斬賊級四百
三十八名顛奪獲賊仗一百三十二件俘獲賊屬一百九
名口輕傷兵劉元等四十三名重傷兵王元吉等三十一
名陣亡兵陳三等六名輕重傷陣亡兵照例優恤合行轉
報又據沙溪烏江二路貴州監軍按察使楊寅秋督餉紀
功副使洪澄源參議梅國樓報准參將朱鶴齡報據宣慰

安疆臣土官隴澄呈稱兵剽大水田探得金刀坑囤在落
濛水之右有賊據守每遇軍兵出入取糧輒被出沒爲害
遂於四月十一日發兵一枝往彼攻取賊黨力拒我兵奮
勇齊登殺死賊首阿富等六名苗賊三十四名其餘仍在
拚死拒捕隨卽豎立招降旗幟該囤居民男婦盡行出囤
羅拜乞降共約一百二十五房獲其鐵券牌一面又據按
察使楊寅秋報據土官隴澄呈稱十三日親督大兵一面
直擣播州焚燒應龍衙宇親屬閭州宅院房屋一面會同
宣慰安疆臣督同水西軍兵二枝於十五日直出烏江老
軍關沿途經過新站刀靶水等處賊兵千餘截伏當令馬

軍衝殺斬獲一十七級生擒二十五名賊潰投箒次日黎明到關賊兵拒關對敵我兵奮勇斬獲一百一十二級生擒三十四名招降二百六十二房押發果哈地方安插又據副使洪澄源呈據安疆臣報稱四月十五日頭目阿卜者遮勒進剋海雲國殺賊十三名招降民二千二百餘房又差目把魏良海胡文魁阿戎等領兵進攻泥壩苦竹養雞等國殺守國苗賊二十四名招降民葉善等二千八百餘房井川江客民九百餘房賊龍原虜草塘司官民四百二十七房俱安插鄰近地方以免亂兵殘害又據按察使楊寅秋報准統兵都司徐成手本移稱五月初二日據塘

報有賊袁守剛董三等千餘潛伏長箐萬丈林拒敵職督把總羅寵丁應聘等奮勇衝殺當陣斬級一顆生擒有名苗頭賊首龔堂等十名餘賊潰入箐內分兵把截路口次日差鄉導張繼賓等入山招撫賊懼願降羅寵井部兵楊鑾等共招降過男婦五百五十名口分投安插該職審得龔堂謝友貴潘廷貴楊賢祖俱西平大苗頭黎民倫係坐寨頭目尙阿蘭等五名亦皆精壯苗頭合行揭報又據按察使楊寅秋報據宣慰安疆臣土官隴澄呈稱司府之兵伐箐尋路梯山攀崖方得箐賊國後山頂營前一土山與左翼曹副將所劄營前一土山係賊樵汲之路賊屯勁兵

數千據守連日陰雨大霧昏濛待晴攻取致蒙左監軍與
畢節道各懸賞銀三百兩各兵鼓舞願效死力就於初九
日四更結束分作五路乘霧往抄賊營之後四面設伏黎明
攻擊賊擁眾死戰該頭目腳已等殺賊五十餘名箭銃
傷者不計從寅至未方將賊兵衝退得占二山隨移兵劄
守二土山協同曹副將之兵奪占左土山劄守本司中傷
兵三百餘人陣亡十五名奪據塞賊咽喉薪水道路稍得
阻截破圍可期又稱安兵屯營圃後初十日五鼓攻其外
牆第一層且抵月城後路矣立刻移知川東監軍督該路
以分賊勢是日未刻劉總兵亦焚燒鐵柱關勢若破竹緣

襲後方會食賊復來衝永甯兵來合哨頗有損折安兵亦有傷理合馳報又據按察使楊寅秋報據貴州衛協捕指揮白璋漢把史聯彩羅一袍陳應龍等各稱遵奉憲令招撫過高坡箐張王壩西坪三蓋塘洪江等處苗頭苗仲杆手王朝仁阿滿黎銘陳子貴李永一等六百三十二戶男婦共二千一百三十六名口各等因塘報到臣除將擒斬功級聽紀功官驗明轉解按臣覈驗陣亡軍兵隨宜優恤俘獲投降男婦人等行仰守巡該道分別安插外該臣會同巡撫貴州兼督理湖北川東等處地方軍務都察院右副都御史郭子章巡撫偏沅等處地方提督軍務兼理糧

餉都察院右僉都御史江鐸看得賊以四月十六日上國
我師以十八日合圍環而攻之迄今且二旬矣國卽險絕
豈真天造地設人迹所必不能到者乎緣時入溽暑萬山
所叢雨多霧重不便仰攻節據營中所報十日之中晴霽
僅一二日賊又時以詐降詐死熒惑我軍帥臣之無識者
或爲其所愚致延時日已經臣化龍懲處及別疏叅糾今
軍中各遵指授一意夾攻賊已岌岌乎有朝不保夕之憂
矣至於向來賊之手足腹心如朱敬如鹿罕如楊順龍楊
永用等或馘之陣上或戮之軍前如田一鵬田良玉彭道
何邦珮等五十一人皆以圖爲內變機洩被害或闔門受

戮或滾崖投降至於總營楊珠則賊之所恃以制服羣醜
抗拒天兵者惟此一人亦一礮而斃自賊來者言賊痛哭
之以爲去一右手不如已死也遂卽詐爲已死用以愚我
不已急乎初十日一攻前燒其關後奪其山掌大竊崖日
促日小當坐見其盡耳臣等再爲痛懲違誤獎勵勤勞多
發懸賞嚴併攻具令之百道夾攻期於必剋約以旬日而
不下者且誅罰及之計竣事當且不久所有連日攻戰情
形合先具題伏乞敕下兵部案候事完議覆施行緣係官
兵攻圍賊勢已窘再報捷音事理未敢擅便爲此具本專
差承差陳治道齎捧謹題請旨

丁憂疏

奏爲丁憂事臣駐劄重慶地方督兵勦播忽於五月二十
二日臣母差家人齎書到臣言臣父封兵部右侍郎兼都
察院右僉都御史臣棟於萬曆二十八年四月二十三日
在家病故臣一聞之心膽俱裂號天呼地絕而復蘇因念
臣父係獨子止生臣兄弟二人臣兄於去年八月內在家
病故臣妻復於去年十月內在任病故於時臣卽欲求歸
養臣父寄臣書曰勦播事重皇上責成甚專必須了此方
可言歸臣亦以明旨方嚴且父命當遵只得抑情任事茹
苦督兵自分旦夕賊滅乞身有日也乃今賊垂亡而親不

待臣之罪尙忍言哉臣兄弟生子俱晚今卽有子姪五人
大者四歲五歲小者一歲半歲不堪應門甯能主喪今所
惇惇然伏匱而哭者獨臣七十之母耳臣之罪於是不可
解矣臣例應守制又應候代但臣之心事已亂臣之交代
宜早伏乞敕下吏部亟請會推相應官員勒限前來代臣
俾臣得早歸守制庶幾葬父養母尙得少盡臣萬一免於
憂死哀死則再生之年皆陛下之賜也臣無任泣血籲天
懇禱之至緣係丁憂事理未敢擅便爲此具本專差承差
楊照齋捧謹具奏聞伏候敕旨奉聖旨覽奏求歸守制固
孝子至情但賊勢垂亡兵機尤急關係西南倚託最重近

該部科公論請留朕已有旨明悉宜抑情遵命視國如家事完終喪有期愼毋哀毀妨誤不准所請該部知道

大報捷音疏

題爲仰仗天威破國滅賊飛報捷音事萬曆二十八年六月初九日據分守川東道按察使張悌川東監軍參政張棟報奉臣屢行催督攻圍當同川南監軍謝詔貴州監軍按察使楊寅秋參議張存意督兵副使尤錫類湖廣監軍按察使胡桂芳參議魏養蒙等及贊理監紀等官會同三省五總兵各路副參遊守等官遵照臣指授方略公同分布自五月十九日以後各抽精兵輪日前後攻打總兵劉綎李應祥爲一日吳廣陳璘爲一日各打後門馬孔英督各路兵攻打前門其沙溪路水西鎮雄兵馬自願撤兵避

嫌於二十八日起營去訖除連日攻打斬級另報外至六月初五日輪該劉綎李應祥攻打後門自寅時起劉綎身先士卒火礮震天至辰時攻破頭道土城賊兵抵敵不住退至二城又行攻打至巳時又將二道石城攻破賊退至三城死拒當因兵疲住攻當夜劉李二總兵卽劄營三道城下拒守是夜城上賊黨紛紛奔下閔逃至初六日輪該吳廣陳璘攻打自寅時起我兵齊上賊卽潰敗奔走大兵擁入各路兵亦卽一擁齊進是日馬孔英從前門於初五日夜卽遣遊擊李經守備萬民英領土漢兵劄守飛龍關下當有推官高折枝亦卽在彼監督至日寅時驅兵上圍

各苗奔出大戰斬獲無算當時前後大兵會齊國上搜捕
據各苗稱逆賊楊應龍見官兵大入倉皇無計一面自縊
一面放火自焚火未及然賊已氣絕有屍見在眾驗果真
當將賊子楊朝棟楊以棟賊弟楊世龍賊妻田氏朝棟妻
小田氏賊婿宋承恩馬千駟賊軍師孫時太惡黨何漢良
田一鵬楊明葉喜受等二十餘人俱擒獲見在候解餘黨
仍行搜捕我兵到國爭搶財物人多嚴禁不住幸未至大
有殺傷卽今賊巢一空我兵盡劄國上千年狂寇一朝蕩
平除功級查明另詳外合先具報又據監軍謝詔楊寅秋
張存意等川東兵巡紀功參政張文燿等總兵吳廣劉綰

李應祥等及臣標下原任參將余德榮各報相同等因到臣案照臣自本年二月十二日興師以來節將官兵攻剋關寨擒斬功次俘獲男婦招降人口等項陸續會本題知訖後因日久攻圍不下又節次行催令分日前後遞攻又差參將余德榮守催及將誤事各官叅究臣擬入營親督起行間隨聞先臣之訃該臣哀毀昏迷中尙恐諸將懈弛誤事隨於成服之後卽行文營中照得三省興師八路勦播誠能戮力齊攻勢如摧枯拉朽乃各總兵畏賊如虎未戰先退以故曠日持久迄無成功老師費財日甚一日本部院方擬策馬入營親督交戰偶以聞訃不便臨戎合再

發旗令嚴催如再畏怯不前定以賜劍從事等因通行去
後今據前因該臣會同巡撫貴州兼督理湖北川東等處
地方軍務都察院右副都御史郭子章巡撫偏沅等處地
方提督軍務兼理糧餉都察院右僉都御史江鐸看得逆
賊楊應龍恣逞淫威甘爲叛逆破城站已三五處殺官軍
至數萬人以致震驚西南搖動海內彼恃此固險絕以爲
人迹必不可至也乃今恭遇皇上神武威靈百蠻震懾輔
臣紆籌於旃廈之間本兵授策於荒徼之外坐使萬人同
心三軍用命兩日之內連剋三城盡破險固因而元兇自
盡逆黨就擒闔閭惡苗盡膏霜刃削株掘根靡有孑遺從

此四封千里盡入皇圖尺地一民盡歸王化三省永無狗
吠雞鳴之警四海逆折憑山嘯澤之姦臣等待罪地方殊
爲多幸欲候查明功次一體具奏恐致耽延且天長萬里
事卜浹旬海內之屬目方殷皇上之關心更甚合先馳報
以慰聖懷緣係仰仗天威破國滅賊飛報捷音事理爲此
具本專差舍人王化遠齎捧謹具題知

告病疏

奏爲播事已竣臣病甚危懇乞聖明亟賜放歸以活殘喘以營親葬事臣愚不肖誤蒙皇上任使督兵勦播正在攻圍忽報丁憂已經具疏仰陳求代守制自發疏後旋即滅賊又經報捷去後臣封疆之臣例應候代不敢卽去方欲乘此候代之日督併文武諸臣經營敘功及善後事宜報命闕下卽移駐境上俟有代者當卽奔歸乃數日以來感病殊甚初猶以爲乍聞親喪哭踊過度病亦其常久當少愈乃日益久病益深今且食飲漸廢行坐失常日惟有伏苦而臥耳臣幼而讀書國爾忘家君爾忘親亦習聞父師

之訓豈其臨事而敢背之顧在今日力已竭盡精已銷亡
卽欲勉強支持有萬萬不能者蓋賊雖已滅然目前諸事
皆須臣手自經理凡散遣兵馬查算錢糧留屯置守設官
善後一日之間千頭萬緒乃又復忽自念身爲人子親在
不能事親死不能歸老母在堂倚帷而望時一痛至涕泗
橫流左右皆泣不能仰視人有如此而身不病病不危者
乎哀過甚則病而重之以勞勞過甚則病而重之以哀欲
節哀而內有必不能抑之情欲節勞而外有必不能卻之
事愈勞愈病愈哀愈病卽今臥不能見人以字達之手不
能作字以口授之人至於此所不傷生滅性者其與幾何

至於傷生滅性臣不足惜臣家亦無足惜惟是夜郎千里
初入版圖後事之收拾前事之經營一不當機便至廢壞
行且掩文武之成勞貽西南之大害臣之肉其足食乎此
臣所以仰天椎心泣盡而繼之以血也今該部不知已推
人交代否卽推亦不知卽能速至否人亦有言死亦可忍
臣忍死矣伏乞皇上垂念臣情矜憐臣病亟下吏部將新
督臣如未推卽速行會推如已推卽嚴催速至令臣早得
生還不至誤事此非獨爲臣實爲西南爲天下也臣無任
涕泣哀鳴之至緣係播事已竣臣病甚危懇乞聖明亟賜
放歸以活殘喘以營親葬事理未敢擅便爲此具本專差

承差張顯恩齋捧謹具奏聞伏候敕旨奉聖旨吏部知道

請褒蜀王助餉疏

題爲蜀藩義助軍需請乞賜敕褒獎以表忠賢事據四川布政使司呈據長史司呈奉蜀王令諭動發祿金二千兩米五千石助充軍餉著長史司呈請批貯有司官庫犒賞官軍之用敬此合行呈請發收等因到司轉呈到臣除批行解發重慶府收貯登報循環轉解營中隨軍犒賞支用外該臣會同巡按四川監察御史崔景榮議照播賊猖亂奉天征討師行糧從頗稱浩繁惟茲蜀王捐金犒士足徵屏翰精忠助餉除兇永作山河帶礪天潢高品帝室名賢卽今羣醜盡殲地方平定宜彰盛美以表忠賢相應題請

伏乞敕下禮部覆議特賜敕諭褒嘉仍容臣等備辦花幣
羊酒恭送王門以彰盛寇盛典統候聖明裁定行臣等遵
奉施行緣係蜀藩義助軍需請乞賜敕褒獎以表忠賢事
理未敢擅便爲此具本專差承差張顯恩齋捧謹題請旨
奉聖旨蜀王捐祿犒軍忠貞懋著著寫敕獎勵仍行該撫
按官備禮送府以示褒勸禮部知道

議留免覲疏

題爲議留朝覲官員事據四川布政使司呈云云該臣會同巡按四川監察御史崔景榮議照川省各府州縣正官朝覲自有定規乃臣子述職大典若非有萬不容已之事曷敢輕議所免但本省時有不同事當通變前此播賦未減正佐各官或責之儲糧治器或委之押夫運餉或隨營監支或隔營贊畫卽全省盡留尙恐不支茲幸逆酋就平事雖稍省然拮据經營半載於茲方得息肩良亦苦矣卽今若不分別緩急一槩奏留不無有妨大典一槩不留在他郡別邑猶或可支至若重敘馬澶四府州與所屬州縣

壤接播境近日起派運夫疲憊已極前項痼疾之民全賴正官加意撫摩愛養休息若令赴朝以一署官安能調劑而蘇起之且順慶府既無正官同知馬性和與蓬州知州毛秉光內江縣知縣楊應登一向在營供事卽今留守兵將尙須供應及查舊例正官議免朝者該佐貳官代入今各佐貳官亦俱在軍前有事未得結絕並難離任似當併免理合具題伏乞敕下吏部再加查議如果事體相應特與題覆將知府傅光宅劉三樂蔡宗憲同知馬性和知州邵崇雅段文郁陳敬衷毛秉光葉聯芳知縣陳大經郭維屏黃日升吳位閔宗聖陽思謙柯文朱宗望楊應登并宜

賓縣正官到日今次俱暫免入覲各府州縣止令首領官
帶同該吏各齋冊與同成都等府正官照舊赴朝行臣等
轉行遵照施行緣係議留朝覲官員事理未敢擅便爲此
具本專差承差李朝恩齋捧謹題請旨

三懇告歸疏

奏爲播事善後有緒孤臣病苦不支三懇天恩早賜代歸
事照得臣以督兵勦播幸而平賊適值家艱已經具報求
代尋而感病又復疏陳去後近接吏部咨該兵科都給事
中侯先春題爲征播機會宜乘督臣關係最重懇乞聖明
亟敕從權移孝以收成功事該部覆奉聖旨卿等說的是
軍旅事大李化龍正值督兵決勝之時當從權移孝力圖
報國待蕩平賊巢處置悉備方聽回籍守制著兵部馬上
傳諭知之切勿頃刻杜門致妨機務欽此欽遵竊念臣以
庸愚重荷委任卽宜捐糜此身何敢更言家計顧事已大

定勢不容留有不得不據實言之者蓋皇上所以留臣以蕩平賊巢也乃今則賊巢已蕩平矣以處置悉備也乃今則處置已有緒矣臣不明言則皇上卽聞捷報將無解顏於蕩平而復關心於處置以爲臣之去尙在可緩乎臣自五月以來計賊授首當在旦晚諸凡撤兵留屯敘功善後業已不次通行三省應預備者令早預備應議處者令早議處以故平賊三日之後兵卽撤歸今所留防守隘口彈壓地方者除烏江沙溪二路餘六路各一裨將領兵三千共一萬八千而已其應撤之兵在湖貴者臣已移咨該省撫臣徑自遣歸在四川者已陸續到重慶臣督併道府隨

到隨發計不數日當卽去盡至於改土爲流一節其應設
府縣規模已定應用文武材品已晰臣已一面行令以次
入播經理惟是事關三省須與各撫臣議過詢謀僉同然
後併敘功疏上之計不出一月而事已大竣矣臣在此已
無所事事矣若後來修城池招流移闢田土則需以歲月
後之人當自有任之者亦自無難而亦無用臣之過計爲
也乃臣之所慮則惟恐朝廷之上不知此情該部不卽推
臣不卽代俾臣以千辛萬苦之身九死一生之病兀坐官
署號天踊地以日爲年儻一旦溘先朝露則臣之家計臣
何忍言羣臣得無爲臣寒心皇上得無爲臣動念乎夫南

北風氣原不相習憂勞之人瘴癘易染自六月以來監軍
參政張棟以積勞道死軍前效用湖廣照磨張居仁以染
病客死二臣皆北人也彼皆一事之勞一時之病而已若
此矣臣之病苦臣之憂危亦何待臣自言惟望皇上早賜
生全無令他日爲臣惜之而已爲此具疏特懇伏乞皇上
速下該部亟推代者如已簡用有人亦乞嚴旨催來速代
庶病臣可望苟全天恩等於覆載臣無任流涕哀號之至
緣係播事善後有緒孤臣病苦不支三懇天恩早賜代歸
事理未敢擅便爲此具本專差承差李朝恩齎捧謹具奏
聞伏候敕旨奉聖旨吏部知道覆奉聖旨李化龍准同籍

守制員缺著便會推忠誠練達堪任的去

獻俘疏

題爲仰仗天威勦平播逆循例獻俘并解進得獲器械伏
候宸斷處分以明國法以彰天討事據四川按察司呈奉
臣紙牌照得播賊楊應龍與兵造反自取誅夷所有官兵
蕩平巢穴得獲酋屍與在國內生擒叛黨旣經監軍紀功
等道審驗已明覆覈無異通應獻闕請旨正法但賊犯頗
多途遠不便似宜分別重輕酌量起解仰司卽便會同布
政司并在省各道將重慶府解到賊屍一軀并賊犯田氏
楊朝棟等一千叛黨逐一再加審驗明確分別某某情真
罪大應解赴闕用彰天討某某情罪稍次應監候會審就

近處拾取具歸一供詞備由呈詳以憑會題等因該本司按察使沈季文會同布政司左布政使盛世承管分巡川北道事按察使周嘉謨分守上川南道參政王嘉謨提學道副使莊懋華分巡川西道副使秦鄰晉審驗得賊屍一軀并賊犯田氏楊朝棟等一百四十一名口與已故吳阿元楊真瑞毛氏元壽楊國翰楊林六名口通共一百四十七名口俱於萬曆二十八年六月初六日五鼓時分攻破海龍國當被官兵擒獲解出等情參看得逆賊楊應龍楊朝棟等以數百年之世家據方千里之土地罔思忠順敢肆兇殘始猶自荼毒其人民繼遂漸繹騷吾疆界白石口

之掩襲逆我顏行合江城之要求遂彼狡計撫之而益無
忌憚防之而愈肆猖狂劫堡屠城積骸徧野戕官殺將流
血成渠震驚西南半壁之天煩費海宇全勝之力幸仗皇
靈特成凱奏元兇殞命於私室羣黨駢首於合門靖穴犁
庭一紆華夏之氣瀦宮赭室始盡叛逆之刑生擒諸犯俱
係逆黨悉宜解赴闕廷恭候天誅惟是途長人眾難以盡
解况人同叛逆情有重輕委應酌量起解如田氏楊朝棟
楊以棟楊惟棟楊良棟楊勝棟楊堪棟楊奇棟楊真惠楊
嵩壽楊兆龍楊從龍楊世龍楊國棟楊成棟楊聯棟田氏
田氏田氏田氏田氏楊氏楊氏共二十三名口則酋之一

門妻子兄弟姪孫姊妹兒婦叛逆之家自當無分長幼男女若楊七楊滔則酋之近族領兵爲逆者宋承恩馬千駟張世爵田一鵬田飛鵬則酋之至親相助爲逆者何漢良何廷玉馬忠孫時泰則酋之心腹成其爲逆者穆炤楊真戴貴董鼐陳大才袁鼐羅江元周五巴何茂春吳阿仲吳阿舟則酋之牙爪資其爲逆者許廷忠何玘張玉王積仁吳進遠楊華酋之信任葉進喜王守爵祿壽高忠元慶元酋之親近則相與暴虐一境打點四方以濟其逆者共三十三名皆罪大惡極姓名昭著人之耳目人人知其爲逆者張氏何氏二口係酋之至親賊黨之妻妾內助爲逆者

以上通共五十八名口俱應獻俘用彰國法其餘賊如楊
守龍楊文楊福楊光達楊守爵楊宗慶楊學楊春芳楊紹
宗楊瑞鶴楊致祥堂保田有年田有時田有秋田有旺田
澤田有貴田善保董成爵馬邦字宋一變宋堯相張萬受
趙元吳王受李大李二李全王世雄劉保僞內使慶壽楊
富雙壽善奴王守忠天保四慶陶鳴楊長壽辛巳夏元合
壽馮壽壽元己卯石泉會元金牛胡雲貴慶祿官桂阿拾
僞綵女張氏田氏田氏張氏田氏徐氏楊氏美松周氏楊
氏張氏童受劉鳳梅花劉奴元秀春鳳李氏顏氏祖秀金
連善緣齋嬖篆秀同生五奴珍秀善秀任秀金秀以上八

十三名口或隨從而不當事權或任用而未臨戰陣或楊氏疏屬或田氏子姪又或婦女幼穉廝養下人叛逆雖真罪惡未甚且不無林木池魚間有可原內除篆秀任秀元秀齋婁願隨田氏赴京外其七十九名口應監候會審定奪等因併將各犯情由開款呈詳到臣又准巡撫貴州兼督理湖北川東等處地方軍務都察院右副都御史郭子章咨據貴州按察司呈奉本院批據監軍按察使楊寅秋參議張存意會同各路將領等官陸續當陣擒解播逆賊首楊兆麟等發司監候今者仰仗天威官軍用命逆賊伏屍西南享安枕之休狐兔歛跳梁之迹除黨逆雖真情罪

稍輕者聽候會審明確就近發落外所據渠魁巨逆情真
罪當各犯相應解赴總督軍門類解闕前明正其罪就該
本司會同布政司左布政使應存卓督糧道參政郭廷良
貴甯道參議梅國樓新鎮道參議張文奇驛傳道副使尤
錫類畢節道副使洪澄源都清道副使袁應文提學道僉
事徐來儀并鎮甯定番普安永甯等州知州李珏王應昌
龍時躍陳聖佐會看得逆首楊應龍父子本以草澤餘孽
一旦敢行稱亂幾至震驚西南甯獨恃彼峻關險固疊嶂
複嶺之足阨我哉亦惟茲虎噬鴟張之徒或置腹心或列
爪牙庶幾奮螳臂以當車轍耳今據左右監軍督率將領

土司先後擒縛元兇如楊兆麟尙義夏文茂彭道陳大恩或以親枝總管糧馬或以親暱贊決謀議阿萬楊正邊楊通漢曾先鋒於飛練袁五受張守欽曾首難於烏江馬騰漢之殺將綦南聶璽彭永壽之拒敵窮圉文章之主謀探聽於都會皆兇逆貫盈罪惡滔天俱應解赴總督類解赴京明正典刑等因到院隨批楊兆麟尙義等既經審明或以戚族而委身凶德或以亡命而假嗣姦徒罪在不赦法當獻俘仰該司差的當官押解總督軍門類獻繳除行按察司將會審過楊兆麟等供詞開款咨報外合咨查照施行等因移咨到臣案照先據四川按察司管分守川東道

事按察使張悌呈奉臣憲牌行委前去軍前提調兵餉依奉馳赴營中會同本省監軍參政謝詔今故張棟及贊理監紀同知史朝貞推官高折枝等日遵指授方略約會三省文武盟神設誓聯諸將士而申督之六月初五日連破重城初六日質明一擁直上逆龍時已自盡妻子家屬與同謀叛黨一時全獲本日辰時職等三道會同湖貴監軍按察使胡桂芳楊寅秋參議魏養蒙張存意督兵副使尤錫類總兵劉綖吳廣陳璘李應祥馬孔英等俱齊集國後樓上點驗逆首家口并將首屍一軀擡至樓左八道五鎮出樓相驗時首初死相貌猶生兇悍驍雄之狀迴與眾殊

眾手共指眾口共讐呼妻子田氏楊朝棟等來視一見痛哭悲不自勝五司七姓之讐人強半俱在訊之無不謂此眞楊應龍而深快其死也身屍無假家口皆眞隨該總兵劉綎吳廣陳璘馬孔英李應祥等各陸續將酋屍一軀并賊犯田氏楊朝棟等一百四十七名口解赴本部院審驗隨奉憲牌看得逆賊造反流毒三藩乃天兵所臨父子妻女親族黨惡一鼓盡擒不遺種類眞足以洩人神之憤而伸國威但酋屍叛黨未審眞僞遽難准信合再審驗牌行本道會同在府各道多官從新覆勘要見楊應龍身屍是否眞僞田氏楊朝棟等是否正身逐一審驗明確一面具

由詳報一面起解赴省聽候獻俘依奉又該本道仰體本部院慎重再三至意復會同東南督餉紀功參政張文燿副使史旌賢參議劉一相僉事徐仲佳知府傅光宅同知史朝貞推官高折枝等齊集公所行取逆犯田氏楊朝棟等各到官將楊應龍身屍開棺洗面仍復審視據見在各伊家口與各頭領并播州生員原奏土民合詞僉稱身屍極真具結在卷覆驗楊朝棟母子妻女及同謀黨類與各內使人等俱係正身詳審所犯事由共稱楊應龍委以兇殘致干奏訴不遵勘問擅殺官兵白石口之事蒙恩放同益無忌憚飛練綦江連遭屠掠自取天兵埽滅械繫再無

別情該五道看得楊應龍倚恃險關堪嘆負隅之虎開修
絕園足噬坐井之蛙禽獸宣淫豺狼肆虐用滿滔天之罪
致勤動地之師去年六月念一日入搶綦江今歲以六月
念一日解俘重慶好還不爽審驗極真固無毫髮之可疑
也據法賊屍與各逆黨俱應懸首藁街獻俘郊廟但罪有
首從之分則惡有重輕之等似應止解賊屍并渠魁惡黨
其餘逆狀稍次者宜候再審明確就近分別治罪發落等
因并據貴州按察司管解楊兆麟等一十四名及稱數內
阿萬文之宗楊正邊三名在途病故取有所在官司結文
前來俱經發仰按察司監候及將田氏楊朝棟等覆審詳

報去後今據前因該臣會同巡撫貴州兼督理湖北川東等處地方軍務都察院右副都御史郭子章巡撫偏沅等處地方提督軍務兼理糧餉都察院右僉都御史江鐸看得逆酋楊應龍楊朝棟等么麼小醜荒服遺苗荷天朝浩蕩之恩養成羽翼恣鬼國兇殘之性謀動干戈叛我天常恃彼地險重慶城已逃法網白石口輒逆顏行罪已不止於無將法猶姑處以不治不思天地之德無所不容乃謂虎狼之窟眞爲可恃狂謀益甚虐燄愈張廣招叛亡爲腹心大收苗夷爲牙爪刻木立信斬山設關殺人盈野盈城舉事無天無地震動西南旣起飛揚者之志繹騷東北更

歆窺伺者之心臣下隱憂主上旰食而逆酋方且哆大言以張疑布姦人而行間招延遊士結好鄰封堅壁清野常以逸而待勞秣馬礪兵動以少而覆眾豈欲憑深負固效子陽之自帝一方固且拓地開疆慕元昊之抗衡中國何意清平之世發此大難之端幸遇我皇上天威震蕩神武布昭文武同心將士用命八路之軍聲沸地三藩之儲峙連雲遂乃破其重關因而圍之三市彼猶設三覆以待我則盡九地而攻霆擊電掣風雲之勢無前鳥駭魚驚狐兔之羣若掃元兇計盡無之甘投繯而自縊羣黨伎倆已盡舉束手以就擒剖腹而實之鹽可憐故主引頸而繫以組

共指新官軍師謀士累累載途繡女閨人紛紛過市蓋壯士揮戈盡敵而返故纍臣露鼓舉族以行可謂削株掘根真是犁庭埽穴從此三省拋家失業之民得歸故里且使四方揭竿斬木之輩暫戢雄心蓋酋之作惡實百蠻未有之惡故酋之受禍亦百蠻未有之禍此真足以仰副廟謨肅彰天討下洩一方之憤上紓西顧之憂者也所據逆酋楊應龍原係元兇正犯身屍一軀法應解獻於國門生擒田氏楊朝棟等俱係同謀爲逆人犯通應伏誅於闕下但犯同叛逆情有重輕旣經兩省二司各道重覆會審明確委應分別起解除監故途故外內將酋屍一軀并賊犯田

氏楊朝棟等六十九名口如法肘鎖同隨行使女篆秀等四口選差敘州府同知史朝貞遊擊江萬仞守備萬民英指揮高淩漢千戶李同芳百戶潘繼勛范希正管押赴關及將得獲欽賜誥敕印信并銅鼓器械據各總兵解到共計二百八十六件於內揀得銅鼓驗係漢時古器盔甲鞍轡刀弩槍箭擇其完整者共得九十五件與誥敕印信五件併交各官隨本進繳其餘賊犯楊守龍等七十九名口發四川按察司牢固監候按臣審明另行具題并將不堪器物一百八十六件發成都府收貯外伏乞敕下兵部議覆銅鼓器械及誥敕印信付內庫交收田氏楊朝棟等行

法司會審如果情真罪當恭候覆請照依律例分別正法
楊守龍等行巡按御史會審明確分別重輕徑自具奏就
近發落其楊應龍身屍仍應剉碎與同各犯首級應否傳
示天下以爲土司酋長叛逆者之戒統候聖裁緣係仰仗
天威勦平播逆循例獻俘并解進得獲器械伏候宸斷處
分以明國法以彰天討事理未敢擅便爲此具本開坐專
差承差苟增齎捧謹題請旨

計開

一元惡逆賊一名楊應龍身屍一軀查逆酋實年四十九
歲原籍山西太原人先世有名端者唐乾符中南詔反端

糾兵破走之遂據播地歷宋及元世有其土至我朝洪武
初納土歸降仍給之授宣慰使屬安撫司二長官司六其
地東西南北可千里西北塹山爲關東南俯江爲池林木
蔚蒼田疇豐美蓋奧區也應龍生而雄猜陰狠嗜殺無忌
初娶於張龍虎山張天師之族女也無寵別居之妾田氏
最幸田氏讒張氏誣以姦應龍怒命人殺之並及其母弟
戚獲之在播者無遺類自是益復以殺立威州人小有睚
眦輒誅滅之所殺傷無數州人不堪其苦所屬五司與七
姓之民及張氏家奏訴之並告之貴州撫按以聞下四川
撫按按問逮至繫之重慶獄將坐以大辟會有倭警徵兵

援朝鮮應龍詭言欲起兵以征倭自贖許之得脫歸歸而
有詔止其兵應龍益無忌復逮問之不復來益爲媢語蜀
撫臣發兵挾之應龍不與戰誘之深入至白石口縱兵盡
殺之事聞遣總督經略至則應龍謬爲不知者委其事於
諸苗時東西方用兵勢難窮治因就撫之應龍益橫所居
飾以龍鳳僭擬至尊令州人稱已爲千歲子朝棟爲後主
益選州人子女爲繡女閹人民間有女十三歲以上皆獻
之謂之呈身須不用乃嫁之不呈身而嫁者罪至死嘗一
日而閹割三十二人其兇殘不道類如此有袁子陞者其
頭目也畏其禍避之合江應龍遂領兵掠合江逼其城城

上人縋而與之執以去至則縛之先割其肉炙之令自食
然後磔之以其肉食諸苗初白石口之事五司七姓皆助
兵焉至是修前郅盡逐殺其人有逃避不獲者窮追之逼
偏橋得羅承恩磔之如袁子陞有全家獲之者取其妻女
對其父與夫令諸苗淫之或裸而坐之木上叢射之以爲
笑樂或燒蛇令從陰入其腹人蛇俱斃盡掘其墳墓燒屍
而揚其灰益廣招諸苗爲羽翼五司七姓之地並其妻子
盡以與苗不足侵湖貴四十八屯益之州人有稍殷厚者
因事誅之沒其家以養苗自是一州皆苗精悍推鋒者無
慮數萬其苗皆食梁肉乘肥馬僕從自隨人人以爲親已

願爲之死無恨以故用兵所向克捷二十七年春破飛練
殺人以萬計獲楊都司跪而斬之是年夏破綦江殺房參
將張遊擊盡取一縣資財子女以去少壯老弱者殺之投
屍於河自大江流下江水爲赤時勦旨已下應龍情不爲
意曰勦撫任爾但恐進我關來不能出我關去耳時徵兵
未集應龍益爲侵掠以張威冬焚東坡爛橋王嶰湖貴道
梗不通明年春正月焚龍泉都司楊惟中避去殺土官安
民志復欲入思南石阡開川兵已被其官寨斬首三百乃
歸無何官兵以八路入遣其子朝棟領兵二萬直走綦江
日爾焚綦江入南川諸有積聚盡焚之以歸彼無能爲也

至則爲劉綎所破敗歸始有戒心發兵爲守禦計無何川
兵四路入關乃頓足嘆曰吾誤矣吾誤矣當吾破綦江遂
據重慶直擣成都取蜀王入營何事不可爲乃今坐受死
哉先是應龍出綦江人傳其所張旗書擒亡勦叛後有自
其營歸者言親見其旗非亡乃王也至是乃知其意在成
都云初結水西爲援縱之深入時水西已無意助之久駐
大水田不去復以事斬其使人應龍始覺其貳於已憤甚
治兵攻之不勝復爲川兵四路屢敗之盡奪其養馬養雞
諸城乃父子相哭而上固川兵攻之急詐死不見信攻益
急湖貴兵繼至共築長圍圍之更番迭攻旣破其一城至

夜猶散數千金募死士拒戰諸苗皆散去無應者起而提
刀自巡其壘見四周營火燭天明於白晝一望無際飛鳥
不能過歸而徘徊無計長嘆數四謂其妻子曰爾各自爲
計吾不能顧爾矣遂與其愛妾二人入室自縊無何官軍
入盡俘其妻子黨類無遺者剖其屍以鹽實之楊氏遂亡
應龍初發難也實以川中累調從征見川兵脬不能軍川
將又時時從之借級安功目中遂無全蜀加以時繫時釋
時勦時撫惟其所欲無不如意以爲天下事可知矣自是
目中且無海內綦江之役自以騎虎者勢不得下異志益
決其申呈文移每日到處尋取逆奴直至九重闕下旣國

破而官軍錄其關門之聯曰養馬城中百萬雄兵擎日月
海龍國上半朝天子鎮乾坤所居之門扁曰半朝天子其
志豈在小哉向使不早撲滅稍需歲月羽翼已成不爲安
祿山慶緒父子則爲公孫述李特王建之流漢唐殷監豈
其在遠幸而廟廊主斷將吏同心一舉滅之亦西南之幸
也應龍八子二孫其一子死重慶七子俱在俘二孫俱被
執一死一在諸逆黨多戰死不死者並在俘

一賊妻一口田氏小名雌鳳年四十五歲酋妾淫妒異常
首逆之謀奪嫡萬曆十四年間唆酋逐妻張氏母家十五
年正月十五日酋飲酒田氏兄田一鵬家醉田氏故激酋

張氏母家有外遇酋乘醉當遣人取張氏併其母首盡屠其家以致張氏叔張時照等奏訴北闕下五司七姓素受酋虐者因起而附和之亂由是起若田氏者真楊氏之禍水而西南之妖孽也

一賊子七名楊朝棟酋長子年二十六歲緣二十三年革酋職准朝棟以應襲土舍管宣慰司事故自二十四年以來播中文書俱用朝棟名先是白石口之戕王師朝棟偶不與謀酋每疑朝棟不從其叛至貴州集兵飛練朝棟遂親領苗往劫以明其與父同志故酋決意爲逆不數月卽有綦江之禍乃大兵雲集天討旣加朝棟猶不席藁請死

復躬入綦界拒敵爲總兵劉綎所敗及棲之國上詐降詐死皆朝棟主之子父濟惡兩世爲逆蓋昔之安慶緒今之倬承恩罪不容於死者也楊以棟酋三子年二十二歲素領莊丁虎苗從父作逆者楊惟棟酋四子年二十歲兇殘更甚酋左右僕役承應少不當意卽手刃之日所殺數人逆酋甚愛之嘗曰類我類我楊朝棟出綦江路惟棟實率悍苗衝鋒九盤子之敗幾爲劉綎所獲乃不敢復出戰圍國之後國上人但謀下投事洩者無論男女皆惟棟手刃所殺蓋不止五六百人彼纔弱冠耳殺人如麻殆性惡者與楊良棟酋五子年一十八歲大兵進討時始領莊丁虎

苗監防部民投順內地者楊勝棟酋六子年一十五歲楊堪棟酋七子年一十歲楊奇棟酋八子年九歲

一賊女一口楊貞惠酋長女年一十九歲許聘貴州洪邊宣慰宋承恩踰時未婚承恩之堅於從逆不顧其祖宗千餘年宗祀則貞惠之以若貞惠者是又洪邊之禍水也

一賊孫二名內一名楊元壽僅三箇月新死止存一名楊嵩壽朝棟長子年五歲

一賊兒婦五口田氏年二十六歲朝棟妻田一鵬女田氏年二十歲以棟妻田良玉女田氏年一十九歲惟棟妻田一鵬女田氏年一十八歲良棟妻田一鵬女田氏年一十

八歲勝棟妻田飛鵬女五田氏卽舊思州宣慰之裔永樂年間思州改土爲流其族多流入播自唐宋來思田播楊並雄西土世爲姻婭故酋父子兄弟率娶田氏

一賊弟三名楊兆龍年三十九歲酋第三弟管清平路兵馬錢糧破龍泉圍黃平劫飛練皆兆龍領兵督戰楊從龍年三十八歲酋第四弟管金鼓路兵馬錢糧最爲淫惡虜秦江婦女以百數楊世龍年三十六歲酋第五弟管周水路兵馬錢糧驍雄有間軍中號曰五相公桑木關邀餉道世龍與楊珠同領兵珠敗世龍先遯

一賊姪四名內一名楊國翰監故見存三名楊國棟年一

十八歲兆龍子楊成棟年二十歲從龍長子楊聯棟年一十六歲從龍次子

一賊妹二口楊氏年四十七歲田一鵬妻楊氏年三十七歲張世爵妻

一賊從弟一名楊兆麟酋從弟年四十歲總管楊氏族屬兼管十二路兵馬二十六年春託獻木帶苗五百入涪州城要挾所過雞犬一空民皆逃竄

一賊族舍二名楊淳年五十歲酋親族舍人善使長槍慣馬戰每酋親臨戰陣淳必率眾衝鋒前後傷折官軍不少楊七年二十一歲酋族舍卽酋大總管楊明子酋平日叛

逆實成於楊珠楊明二賊圍固時楊珠中礮死固上人心惶惶率謀下投獨明父子各領親兵爲酋晝夜隄防又每戰必力令酋得久遊釜中多損我兵糧則明父子之惡遠矣明就擒自盡七仍宜置之極刑

一賊妹夫一名張世爵年三十三歲妻酋第三妹原籍江西卽龍虎山張氏之族張楊亦世爲姻婭酋向殺妻張氏卽世爵從姊張氏之族盡讎楊氏世爵獨爲之用且盡力焉則其妻爲之祟也

一賊壻二名宋承恩酋長女壻年二十二歲係洪邊宣慰應襲往酋戡官軍白石口時貴州撫按卽行承恩絕婚楊

氏勿涉其餘波承恩陽諾陰違竟不之絕二十五年安疆
臣爭新貴縣實承恩從中鼓煽冀合安楊之交其謀狡矣
勦事起承恩爲首誦事貴州十日一報行路知之畏其句
賊無敢言者旣師期近乃被虜上固得無以乎彼以附賊
爲得所繫援也昏童無知自取敗亡宜矣馬千駟酋次女
婿年一十八歲係石柱宣撫司宣撫馬斗斛次子斗斛妻
覃氏姬愛千駟謀奪長子馬千乘應襲故爲婚酋以求援
助綦江之破千駟實率其石柱心腹爲酋先登伊母覃氏
時遣人四方助酋打點使酋得志千駟母子必亂石柱千
駟就擒正法石柱之禍階絕矣不獨擒一播黨也

一賊妻兄弟二名田一鵬首妻兄年四十七歲原籍貴州思南府充酋內司總管總管高安路軍事其所置產近眞州田氏兄弟每至眞州州人必擇其室女少婦之有姿者侍寢一民婦成婚纔數日以姿貌被選其夫有難色卽召至立斬之蓋眞州人恨田氏無不欲食其肉者田飛鵬卽一鵬弟年四十四歲充酋內司總管總管長溪路軍事飛練之劫飛鵬實與其謀

一賊心腹謀士三名何漢良播州赤水里人年五十二歲充酋外司大總管總管諸苗爲人狡猾善說酋倚爲心腹歷年負固逆節實其主使去年漢良統苗破飛練執楊都

司頃其不跪而殺之天討不加故酋遂無忌憚於房參將造禍西南喪十數萬人命若漢良者雖寸斬不足以謝西南人之忿也何廷玉播州人年三十四歲充酋衙門大總管主掌八司五十四里糧差性兇狡喜爲剋剝環播千里內無不被其荼毒者酋之負固謀逆廷玉與何漢良啟之馬忠播州人年四十二歲充酋辦事總管掌衙門一應文書凡酋申文內地悖慢要挾皆忠爲之

一賊軍師一名孫時泰年四十二歲浙江餘姚縣人冒籍順天武清縣入學充增廣生員爲武清縣不容鄉試鬱鬱思亂客遊京師見四方多故蓄謀益叵測酋破棊知罪在

不赦思求知兵之士爲謀主時已斬黃七先在播素善時泰因薦時泰酋當遣心腹文章從京師聘入播充僞軍師首勸酋乘大兵未集入據重慶酋內顧根本不卽從各路兵逼關斂兵一處決戰亦出時泰意蓋王偉徐道覆之流目無宇宙幸酋草賊不盡遂其謀假令事事從之卽終就滅亡諸所勞費不知當若何也

一賊領兵逆黨十六名穆炤播州人年三十二歲先是二十三年征播炤與族兄穆偉同投內地已撫而不勦炤遂殺偉以自解於酋酋使充小溪里頭目多收內地流賊綦江邊地無日不被其劫掠卒至釀成破綦之禍及大兵進

討爲總兵劉綎破其巢穴獲其妻子乃不得已投見已蒙
賞賚給有花牌仍陰與酋通陷王都司全軍於白石口此
一賊者罪不下於應龍云戴貴播州人年五十歲充酋親
兵總管主督戰陣無論平日卽酋棲園兩月前後門日拒
戰傷損官軍千餘皆貴陣前指揮董鼇播州人年四十八
歲充酋四牌提調江外五司皆其荼毒飛練之劫鼇爲罪
魁大兵旣臨詐降南川營仍復暗與酋通子姪往來園上
不絕官軍覺而執之陳大才播州人年三十九歲充酋沙
溪提調破綦先登受酋賞五十兩園上拒敵官兵多其部
苗袁鼇年二十四歲播州赤水里人與酋赤水里頭人袁

子陞同族世讎二十三年征播子陞預先投順已撫而不
勦鼇遂構子陞於酋子陞奔瀘州鼇充赤水裡頭人以兵
逼合江竟挾去子陞支解之連年合界殘劫則鼇之爲也
楊真播州人年五十二歲充首丁山里頭目連年爲害江
津綦江邊地釀成破綦之禍聶璽播州人年三十五歲充
酋松坎提調最近綦界綦安穩東溪百姓數千家十餘年
被其殘劫人人恨不生食其肉羅江元播州人年三十二
歲充酋坐寨管婁山外三元壩苗千餘時出綦南合江地
方爲害袁五受又名袁守貴播州人年三十二歲充酋西
平提調烏江河渡兩兵敗嗣皆五受領苗衝突已又潛籌

援貴州糧運爲士官岑紹勳所執張守欽播州人年四十
二歲充酋龍沙提調與袁五受同衝退烏江河渡兵又同
劫貴州糧爲岑紹勳所執彭永壽播州人年四十一歲充
酋領兵頭目有膽氣善戰每酋拒官兵必永壽領苗衝鋒
前後傷折我兵頗多周五巴播州人年三十二歲充酋仁
懷里提調又充穆炤坐寨連年綦合邊民被劫掠皆五巴
之爲也何茂春播州人年四十五歲充酋小溪里頭目與
重慶江津縣筭溪里接壤恣行侵掠筭溪里民十年拋棄
家業不敢一企足墳墓則茂春之惡極矣夏文茂播州人
年三十二歲充酋沙溪里坐寨同尙義納幣水西併爲所

執馬騰漢涸名馬禿子年四十八歲原籍重慶江津人兇
狠有膂力先年犯事逃播投充領兵頭目誘酋族人支解
人五十四里百姓紛紛逃竄者皆騰漢爲之破寨騰漢手
刃房參將受首賞五十兩人人能道之若騰漢者卽寸斬
猶未盡其辜楊通漢年二十七歲係白泥司下里長官應
襲二十六年首攻白泥司通漢統部苗附酋反戈攻正長
官楊以誠致以誠逃竄白泥苗盡爲酋用已圍黃平劫飛
練白泥苗助賊尤力五司官無不讎酋獨通漢附之

一賊任用逆黨七名許廷忠播州人年四十七歲充酋黨
事把總主聚斂財貨播民被其暴橫多矣何玘播州人年

四十七歲充酋辦事總管主清理土田奪民業以安苗實
玘啟之尙義播州人年三十二歲充酋沙溪統制所提調
最爲心腹用事人屢爲酋通路結連四鄰三月二十九日
酋襲水西營敗復使義挾禮幣往謝過爲水西所執陳大
恩播州人年三十六歲幼充酋心腹小童酋繫重慶時大
恩代收重慶監已貢緣脫去充管事提調固破走投水西
被安疆臣解出張玉播州人年五十一歲充楊朝棟管事
總管與奏民張郢兄弟也郢讎酋玉乃堅從酋父子郢玉
又不時密相往還此其故有不可解矣彭道播州人年三
十二歲酋心腹謀士大兵初樓酋國下道卽詐降總兵吳

廣爲酋作間已見國破復逃去爲水西所獲王積仁播州人年五十一歲卽已故附郭長官王積祿弟先年積祿見酋有逆萌懼及禍奏願改土爲流爲酋所惡積仁欲奪積祿爵從而交構其間竟使積祿不良死而積仁遂爲酋心腹用事充長官矣破寨時積仁坐縣堂辱罵馬知縣寨人無不切齒者

一賊招納亡命逆黨二名吳進達年四十一歲徽州歙縣人舊寓京師放子母銀播人往來京師居停其家因相結識爲酋通錢神於四方養成叛逆楊華年二十八歲原籍南京工部營繕所人久寓北京爲酋耳目去年京城大索

奸細華逃入播仍假兵部旗牌爲酋張聲勢

一賊僞內侍五名葉進喜年三十一歲掌海龍國更收支錢糧最幸用事官軍之攻國也破城之日喜猶率兵拒戰人皆見之王守儔年四十二歲掌通州詞訟祿壽年二十五歲掌酋親兵每拒敵官兵祿壽時出督陣高忠元年三十二歲主四方打點慶元年二十六歲充湄潭坐寨

一賊苗子三名內一名吳阿元監故見存二名吳阿仲年四十五歲播州人充酋老虎兵吳阿舟年三十五歲播州人充酋老虎兵

一賊親婦二口張氏年四十歲田飛鵬妻何氏年二十五

歲田一鵬妾

一賊使女四口篆秀年二十六歲任秀年四十歲元秀年四十七歲齋婁年三十四歲

一獻俘器物共一百件誥命三道敕書一道播州宣慰司銅印一顆諸葛銅鼓十二面大皮盔四頂大皮甲四領馬鞍四副鐵劒二口倭刀一把苗刀三十把花槍二十根大弩十二張箭筒六箇內箭共七十枝奉聖旨兵部知道覆奉聖旨是逆犯田氏楊朝棟等都著送法司擬罪刑部覆奉聖旨逆犯楊朝棟等著便處決楊應龍剄尸張世爵等發遣宋承恩著放回籍還職仍將各犯首級傳示諸夷昭

布天下餘俱依擬

露布疏

奏爲露布事萬曆二十八年六月初六日恭遇平播事竣
臣謹稽首頓首上言露布者伏以辰象麗天七緯判井參
之紀方輿略地八紘嚴夷夏之防故陰慘陽舒天緯所以
陶庶彙而文經武緯喆后所以殿萬邦道如此乎相成世
賴茲而常治垂衣而理爰開弧矢之威舞干以來不廢徂
征之舉黃公元女策贊玉門赤燦素靈符昭金匱洎乎皇
風旣降猶然遠略時聞漢馘呂嘉聲教訖於嶺表唐俘蒙
儉威稜憺乎天南是雖晚近世之作爲孰非大聖人之家
法匪云得已允有成功恭惟皇帝陛下道契書繩祥摛載

玉憲紫微而立極雪踐四神登翠嬀以握圖星飛五老昇
平三紀雲火靜其橫氛受胙九宗風雨漂其濺澤委任心
膺妙選爪牙兵以不殺爲威德用無爲而治朔方叛黨嬰
城旋就誅夷海外渠魁越國甘從繼束宸居端拱天步泰
甯日浴月崑之鄉莫不奉琛而納款紫舌黃支之侶咸皆
解辯而稱臣昆明通太液之波大宛貢天閑之駒春秋之
義無外詩書所稱何加惟此播州介於川貴貞元以往猶
遷客之是居會昌而還爲楊端之竊據本以招討擅此方
州跨重岡複嶺以疏疆介絕澗茂等以設險丹崖紫澗常
截地而滌洞翠壁蒼巒每橫天而截巖羊腸鳥道一夫可

以當關虎嘯猿啼萬騎總爲卻步加以腥煙羃覆毒霧縱橫上漏下蒸坐見飛鳶之墮前溪後窰常多有載之災別是封疆自爲聲教冠紳承襲已歷四朝子姪蒙安洊及千載强弱之形互見離合之勢靡常饑則依人飽則颺去終非馴擾之傳失則其鹿德則其人薄示羈縻之術然猶奉琛奉幣職歲之貢獻無虛不叛不侵非時之征調惟謹迨至逆賊應龍者夷運將終淫凶遂熾天奪其鑒旣安忍而無親鬼瞰其家輒恣行而播虐殺人如不舉害眾若弗勝徇孽妾之言妻甘屠脍翦同官之黨人盡誅夷敵怨五司魚肉不留平遺枿快心七姓烹醢冤徹於三泉懸磔確湯

鑊之刑寘火牀鐵刷之獄是尙恣睢乎部曲已而稜轢乎
縣官數肆嫚書屢馳密謀謂九重爲遠聲不懼於吠堯以
千里自封財無難於使鬼重慶城計脫犴狴已追靈誅白
石口謀動干戈甯辭越志從此恣其玩弄因而極彼譴張
宰割一方睥睨諸省收藏亡命逋逃徧四海之姦糾結生
苗聲勢致兩川之震盛氣豈忘躍馬雄心不憚稱孤狎乃
無將志不在小皇上俯憐愚謬屢沛鴻慈征誅尙緩於後
夫撫戢屢申乎邊吏網開三面聿宏卵育之恩禽縱九頭
倍肆鴟張之志虔劉飛練鬼哭千家糜爛綦江屍橫百里
捐嬰兒以填巖谷刳孕婦以決雄雌萬靈號地稱冤四境

籲天句命樵蘇何計閭閻動輦鼓之哀羽檄交馳城郭盛
妖氛之氣一時惡少儘欲效尤幾種夷酋半懷觀望業已
騷騷乎西南半壁之天下行且震驚乎東北一帶之人心
亂形已成逆圖漸逞全蜀星河搖曳重瞳宵旰焦勞仁望
廓清宜資卓犖而臣以章縫末品樸遯短材偶詔起於田
間遂謬膺乎軍事控四蜀而兼綜湖貴柄在專征奉三錫
而濫秉鉞旄義當滅賊臣感茲恩遇願效驅馳憤同泣劍
甘褻革以從戎心切枕戈計除兇而報國但期平定敢愛
髮膚顧民力凋瘵而未蘇又武備廢弛而不振賊強臣弱
難希擒縱之風一日數驚易斷平安之火於是殫摠朽鈍

獎率權奇謹會同巡撫貴州兼督理湖北川東等處地方
軍務都察院右副都御史臣子章巡撫湖廣等處地方兼
提督軍務都察院右僉都御史臣可大巡撫偏沅等處地
方提督軍務兼理糧餉都察院右僉都御史臣鐸共懷許
國之心咸篤勤王之誼謂夫事關三省必須動協萬全以
固圉安人心以死綏作士氣內葺理而外持鎮靜計頗效
於謝安陰不足而陽示有餘竈頻增於虞詡徵兵之使四
出環秦庭而乞賦無衣寄閭之禮三推憶鉅鹿而重廛拊
髀柄分黃鉞下天上之將軍案有丹書合地中之義旅命
五丁於蜀郡召三戶於楚人集滇廣樓船下瀨之豪連韓

魏奮擊蒼頭之眾秦稱孔武羅孟賁夏育之朋浙號多才
搜霸越平吳之士鷹揚侈譚於齊客喜建功勳駿聲偏重
於燕臺爲憐慷慨有嚴有翼共武服而旂旄央央如漢如
江啟戎行而威靈濯濯咸來奏技莫不從軍又以古制師
行糧從兵貴馬騰士飽爰開庾廩共極舟車籌策徧於橐
囊轉輸酌乎鍾釜艫舳銜尾粟盡海陵之倉組練生光山
積漁陽之甲兵同時雨眾悅蒼雷臣乃於正月十五日擣
衣登壇歃血矢誓宣忠義以作士氣思齒劍者投袂並興
懸賞罰以一人心懷淬刃者超距競起眾憤噓而梁益之
天成霧軍聲動而岷峨之水飛波克日長驅嚴兵待發臣

又於二月十二日五申戒眾八路徂征在四川以綦江南
川合江永甯爲四路總兵官吳廣劉綎馬孔英將之而監
軍以參政張棟謝詔督餉紀功以參政張文燿副使史旌
賢參議劉一相僉事徐仲佳在貴州以烏江沙溪平越爲
三路總兵官李應祥將之而監軍以按察使楊寅秋參議
張存意督餉紀功以參政郭廷良副使洪澄源尤錫類參
議梅國樓在湖廣以偏橋爲一路總兵官陳璘將之而監
軍以按察使胡桂芳參議魏養蒙督餉紀功以參政詹啟
東副使王應霖路雲龍陳興相集羣策於一時宣天威於
九伐娑隊飭元戎之令以律而臧練士雜夷漢之師在和

而克風鶴咸知助順草木都化爲兵賊勢已危狂氛未戢
力伸螳臂尙三覆而設奇若燎鴻毛輒一鼓而制勝諸路
並斬關而入一時多解甲而降婁山巖門萬夫不守湄潭
河渡一葦可杭兵遂環於白田眾已焚其赤社曲房別館
一炬堪憐班馬鋒車闔門咸竄於是巢穴漸定羽翼半摧
獸旣窮而搏人鹿方急而走險賊乃重招逆黨共保巖隈
百仞臨高築距堙而不及一偏廷敵攀蘿葛而難躋自謂
天險可乘兼有積儲足恃猥云得計祇自速亡爰命六師
圍之三市蝥弧屢奮於列校鼙鼓加募乎千金攻極力殫
莫禦疾雷之勢計窮詐得頻貽小月之書臣乃謂其深謀

特申敝備復令按察使張悌入營督戰重戒總兵吳廣毋
與賊通眾志彌堅賊困猶闕連旬積雨共洗蠻蜒之妖疊
雉霾雲實壯王師之氣勢將翦滅事已垂成而臣適遭閔
凶遙傳音耗寸心塗炭乍懷進退之虞簡命眷留更切始
終之慮望雲渺渺向日炎炎事難適夫兩全身惟拚乎一
死勉脩軍令益整兵威旬月迭攻晝宵不息小巖結聚知
蠻滅以非遙異鳥翔翔信賊平其有兆卒徒競奮雉堞平
頽彼力盡於枝梧此骨騰而距躍楚歌四起雕不逝以驚
心越甲重來犬長號而入夢徒揮金而召死士竟掩袂而
別妖妻縱飛走以無門悲蟣蝨之相弔天亡已定矢劍烏

江人力難施投纒荒谷快大兵之畢集遂舉族以就擒剖
腹不減然臍駢首同看繫頸銷人彩女解玉佩而成俘劍
客謀臣抱兵符而就繫電擊星馳三十萬巢穴倏爾成空
摧枯拉朽指揮間根株蕭然盡拔定軍之山頓赭牂牁之
水已丹飛虎飛龍堅城如埽養雞養馬故壘空留止餘草
木之腥無復萌芽之肄訊執已成聚落首功不啻邱陵築
京觀可示來茲勒銅標謾誇已事紅旗十里依依六月班
師翠幟千重蕩蕩三方底定前歌後舞鐃吹半雜於巴渝
繡帽錦衣勝氣全高乎玉壘戎翟因而奪氣流汗走僵將
軍從此開顏告成飲至橐弓臥鼓息壯士之呻吟解劒賣

刀忝農夫之耕耨百蠻稽顙萬姓謳吟重念開闢之難更竭圖維之力因地形以爲疆理招土著而慰氓黎削滅叢祠別營茅社爰分土宇指西母而開圖載布冠裳順東風而受吏易瘴鄉爲樂國矜人起鴻鴈之歌黜夷法於漢官拭目快威儀之觀化瑟張而勿擾熙熙乎坐赤子於春臺太牢享而有餘栩栩然囿壅人於蝶夢本因亂而制治實用夏以變夷何敢言勞期不辱命此蓋神武有赫厚德用威遠克鬼方奉役不淹於三載同符帝德成功僅踰於七旬民未大勞師無再役還千秋之疆土重勒鼎銘戢四海之窺覷坐銷金甲獻俘清廟更承元綽之心上壽明堂旅

受綠圖之福臣無任瞻天仰聖望闕稱慶之至爲此具本
謹具露布以聞奉聖旨覽奏露布朕心喜悅知道了該部
知道

查叅黔路失事疏

題爲黔路失律喪師得關復失據實查叅以肅軍政事據
貴州按察司并左監軍按察使楊寅秋呈差指揮王行恩
管解官犯童元鎮到臣案照本年六月初九日准兵部咨
該臣并貴州撫臣郭子章按臣宋興祖兵科左給事中桂
有根各題同前事該本部議將童元鎮桎解來京審實究
罪謝崇爵偷安誤事卽以賜劍處斬軍前用昭法紀等因
覆奉聖旨童元鎮失律喪師法所不貸著督撫選差的當
官桎解來京審實究罪謝崇爵臨陣先逃卽以賜劍處斬
張秉忠張澍姑准戴罪殺賊責立後功仍嚴行申飭大小

將領俱要奮身力戰毋蹈覆轍取罪不饒安疆臣著遵前
旨宣諭及劉綎等各將聯絡並進併心滅賊毋得有分彼
此驕妒觀望以致大軍久頓不解成功賞格俱在有違國
法凜然決無少假李應祥著充總兵官換制敕與他餘俱
依擬欽此移咨到臣該臣隨卽移文撫臣郭子章并按察
司及左監軍道將童元鎮差官解臣衙門以憑柅解赴京
謝崇爵押至軍前處斬徇眾間隨據三省監軍總兵等官
塘報本月初六日國破賊滅緣由前來又該臣看得逆酋
旣平大兵已撤檄催該省速將童元鎮勒限起解并以賜
劍一口差官捧送撫臣郭子章督行按察司將謝崇爵就

近處斬去後今據前因除謝崇爵候該省處決至日另行具奏外所據童元鎮合先起解該臣會同巡撫貴州兼督理湖北川東等處地方軍務都察院右副都御史郭子章遵照明旨選差千戶霍之龍劉瓊百戶沈正杻解赴京外理合具題恭候聖旨定奪施行緣係黔路失律喪師得關復失據實查叅以肅軍政及奉欽依差官杻解來京審實究罪事理未敢擅便爲此具本專差千戶劉瓊齎捧謹題請旨奉聖旨童元鎮著法司會同兵部審實究擬來說

乞宥程布政等疏

題爲平播酬功宜渥藩臣微罪可原懇乞天恩宥過錄功以昭聖德以勵臣工事該臣會同巡按四川監察御史崔景榮竊惟人臣隨事以盡職惟求免罪何敢言功然王者法天而不私罪疑惟輕功疑惟重此所以羣工競勸而天下莫不尊親也頃者四川布政司貢扇粗糙不合原式致干聖怒罪及經管官員旣降理問趙嘉賓經歷鄭汝清又降右布政王道增參議劉三才又降原任左布政程正誼夫該司職貢不堪若以不敬責藩臣則其罪自當降謫臣等何敢妄爲置喙但臣等身在地方目擊扇事不敢不陳

其始末而況當敘功之時其罪又有可贖者皇上試垂聽焉夫該司貢扇四萬九千餘柄非一時所能造也每年前十二月內支發錢糧買辦物料責委專官管理次年鳩集工匠做造一年至十一月內方完十二月內解進方其造作之時委官二員晝夜稽查朝夕催督自是專管責任乃至慢不經心粗糙違式則趙嘉賓鄭汝清誠不得辭其罪矣若程正誼雖有總理之責但去年播事方殷奉旨征勦正誼職司錢穀百責攸萃諸凡折色如何湊辦本色如何運發器具如何製造官兵月糧行糧之多寡如何定擬無一事不係創設無一議不費苦心人之精神能有幾何稽

查扇柄自不能如委官之專是其所遇之時可憫而其罪可原也劉三才於十一月二十二日接管署印至十二月初七日交與王道增接管俱係裝箱起解之時卽二臣知其不堪而亦何暇改造則二臣之無罪更明白易見者也扇事始末若此臣等方欲據實上陳以釋聖怒而會有平播之捷三臣皆兵事效勞之人臣等因查其功次在程正誼殫心拮据畢力應酬寢食幾忘頭須爲白凡軍中兵食之費皆先事布置之功臣等不敢再言矣在王道增署印三月正當進兵之時計兵發餉手足不停督運程勞水陸並進支發過餉銀六十萬兩積出羨餘銀二千七百餘兩

其發銀入營臣會親取貳封兌之每封重銀四錢然則以六十萬計之其多可知使道增而非廉官豈不能取之以自潤乎漢高帝大賞功臣以蕭何之轉輸爲第一道增給餉豐盈致使馬騰士飽其功豈不偉歟劉三才職掌驛傳當土兵客兵四面入境有司愁苦士民驚惶皆以應接供給爲難三才治粟積芻幾使寸心欲碎艤舟秣馬恨不人百其身如各路荒僻之區無不調停協濟至諸兵止宿之所亦必計日安排以此兵不誼譁遂令民無騷擾逮後來進兵運餉之船隻又皆三才預先整頓而無缺者其功豈眇小哉夫大廈非一木之支太平非一士之略頃皇上見

平播之捷嘉將士之功萬里傳聞無不感泣然遡厥成功
豈一手一足之力方今告廟宣捷論功行賞大小文武莫
不霑恩而三臣效有勤勞獨不得與慶典之榮在三臣固
不敢有所覬覦第覆載之下一物不遺何可使勞臣有不
被之澤耶我皇上德邁帝王卽投珠抵璧何所不能而忍
於兵馬倥傯之時重守臣無心之罪我皇上明並日月卽
蒞屋覆盆何所不照而忍於軍功告成之日棄三臣胼胝
之勞臣督撫一方又受命勦播在三臣罪有可原功有可
錄皆宜亟爲暴白而申雪者若不詳陳於皇上之前則功
罪不明勸懲無據無論臣職司謂何抑何以磨礪任事之

臣乎伏望我皇上開天地之心擴包荒之量憫程正誼遭
時不幸之苦鑒王道增劉三才原非造扇之人並念其焦
勞兵事共成平播之功將程正誼劉三才復其原職或仍
將程正誼量加罰治王道增近被陝西論劾降級而論功
亦當敘陞或復四川之原職或復陝西之原職則皇恩浩
蕩賞罰昭明有罪者雖小必懲有功者雖微必錄豈惟三
臣感恩圖報天下臣民皆戴之如雨露畏之如雷霆爭相
勸戒於大公無我之世矣緣係平播酬功宜渥藩臣微罪
可原懇乞天恩宥過錄功以昭聖德以勵臣工事理未敢
擅便爲此具本專差承差劉佐齋捧謹題請旨

乞卹張監軍疏

題爲監軍方面官員積勞死事懇乞聖明破格卹錄以勸
勞臣事據四川布按二司按察使營分守川東道事張悌
右參政管分巡上川東兼整飭兵備道事張文燿呈奉臣
憲牌仰道官吏卽便會同備查監軍張參政歿於王事與
征東監軍陳御史事例有無相符逐一會議明白具由通
詳以憑具題施行奉此依奉行據重慶府知府傅光宅申
稱看得監軍張參政忠義性成忘身殉國叱馭而輕萬里
按劍而感三軍飲食不遑運籌輒效膚功旣奏大數乃終
臣子之分已完優卹之典宜厚況播地眞同異域展土更

是奇功似應比照御史陳效事例加贈廕殊恩始爲忠勤
永勅等因到道又該二道會看得監軍參政張棟性篤忠
貞才兼文武擣巢靖寇備歷諸艱沐雨櫛風忽侵二豎眞
攄籌而盡瘁撫旅櫬以含悲所有優卹典儀自應比例從
優查得往歲東征監軍監察御史陳效歿於王事該總督
尙書邢玠具題該吏兵二部覆奉欽依追贈光祿寺少卿
廕一子錦衣衛世襲百戶仍與立廟祀之今監軍參政張
棟以播事告成積勞殞命及查播爲西南遠裔風土險惡
不啻朝鮮比例擬卹正相符合但參政從三品階級若贈
京銜似應照品而錦衣百戶於廕典無加焉再惟贈廕之

典誠榮廟祀更所當議蓋以死勤事祀典甚明本官運籌督陣備極焦勞坐此成疾歿於王事所宜立祠崇祀賜額表忠俱不容已呈乞具題等因由詳到臣卷查先該臣照得川東監軍參政張棟奉命征播監理軍事方當大捷遽爾物故歿於王事深爲可憫及查東征監軍監察御史陳效卒於朝鮮該總督邢玠題該吏兵二部覆奉欽依賜有贈典恩廕該道事體有無相同已經牌行分守川東道會同兵巡上川東道查議具由通詳去後今據前因該臣看得人臣之事君進不辭難退不計利凡以明忠貞之節盡職分之常也故死生患難漠然不較而功成於當世名著

於春秋後世慕而傳之明主知其然不惜高爵厚祿以示
優禮生殫榮華死極褒顯此非期於相當要以各成其是
而已播事之起且十餘年當事者議撫議剿人持一見譬
如道傍築舍久無成功遂使小醜幾成大難去年綦江失
守內外洶洶臣奉命於田野之間惵惵入蜀兵力糧峙無
一可恃同事之人皆爲臣危於時棟起家監軍慷慨請以
身任棟素有才名又敢決明斷臣雅重之凡密謀軍事棟
皆與焉旣進兵時播人劫於賊之積威自爲戰守我兵舉
步皆成荆棘以故臣於諸文臣尙未敢督之深入棟獨短
衣匹馬從諸軍後其入關最早且素性方嚴待諸將崖岸

嘶絕時劉綎以宿將自雄氣張甚獨於棟以嚴見憚惟所
頤指以是屢戰皆捷卒之破賊川東之力居多云又播多
大山茂箐溪水皆有毒霧時淫潦三月死者相屬賊據險
不下益修守備棟與按察使張悌力主分日進攻親自督
戰六月初五之役手白梃立陣前賊矢石如雨人人皆震
棟不爲動是時棟已病諸將每多觀望不肯力戰賊訶知
之臣又適遭家難使微棟等事且有變賊平棟還至蒙渡
去綦江二百餘里病亟軍吏問疾語諄諄不休察之但云
齊上齊上猶攻國時語也卒之日三軍盡哭知與不知皆
爲流涕夫播寇之平以天之道皇上之神武幸而集事臣

子何敢言功三省文武華夷義從咸在軍中亦非一手一足之烈也顧兵有當機事貴能任有識者能以意爲之樞則用力省成功速以棟之才氣無雙奮志滅賊卒能成功繼之以死其所樹立固自超軼絕倫矣棟有二子皆在襁褓其妻已先歿世旅櫬東歸更爲零落臣心極其嗟惋儻不借國恩浩蕩噓其旣寒之骨則稚妾幼子尙不知其所終而盡忠死事之臣將有不瞑目於地下者夫死生常事耳第棟之死原以衝煙觸霧諸苦備嘗督戰紆籌寸心幾嘔鞠躬盡瘁志決身殲揆之人臣之義以勞定國以死勤事殆兼有之卽朝廷酬功卹死之典亦安可處其薄耶照

得已故監軍布政司右參政張棟忠貞報國慷慨臨戎決
策除兇方遂請纓之志殫心畢命頓成褒革之忠賊未亡
而誓不俱生視武侯之未捷先死者已無遺憾疾已革而
言猶對壘視宗澤之空呼過河者大爲有功至其不詭不
隨無忝勤事致身之義就中任勞任怨竟成開疆拓土之
勳丹衷與銅柱齊標青簡照玉關不朽論功爲最卹典當
優所據贈官廕子立祠各項既有朝鮮事例可援又經兩
道查議非濫相應比例上請伏乞俯賜下部覆議明白查
給施行庶勞臣可酬忠義有勸臣不勝拳拳緣係監軍方
面官員積勞死事懇乞聖明破格卹錄以勸勞臣事理未

敢擅便爲此具本專差承差劉佐齋捧謹題請旨奉聖旨
該部知道

平播全書卷四終